



# 黄帝功德纪

于 右 任



陕西人人人的社



黄帝公孙轩辕氏,实吾中华民族之元祖。吾中华民族有此生息昌大之疆土,有此博大悠久之文化,有此四千余年震烁世界之历史, 新维黄帝,为国族之神。

于史,黄帝既战胜蚩尤,东至于海,西登昆仑,南及交趾,北出幽陵,而开拓中华民族已有之疆土。其子孙之蔓延于各地也,如汉族固为其苗裔,而西藏族之羌,回族之安息,苗黎族之禺号,蒙古族之匈奴,东胡族之鲜卑。金人之祖且为黄帝之子清,满清则金人之后也,是皆近世治史者所能考信。是中华民族之全体,均皆黄帝之子孙也。

皇古荒昧,孰启鸿濛?生活文物,孰为大备?黄帝不惟为中华民族之始祖,抑又为中国文化之创造者也。其发明制作,除人民衣食住行日常资用者外,尤要者如文字、算术、历数、医药、音乐等,皆万世之资,而一时已备。至于指南之针,辨方定位,迄今为世界交通所大赖。然此犹事功之彰著者言耳。更如至德要道,典籍

恒垂,后世玄言,动皆称述。是此精神文教之施,亦万世万类矣。

我中华民族有如此之伟大,中国文明有如此之超远,实黄帝拓殖创造之功也。兹我民族奋图复兴,思缵我远祖之皇烈,国于近世,岂有以四百兆庶众子孙,凭席威灵,而无以遂其国之自由平等?桥山之弓剑可攀! 千里万里,千叩万叩,其共誓于我元祖之陵。

于国之初,于岁之春,中央政府倡率民族扫墓,将有事于桥陵,礼也。斯为天下所未尝有,抑为天下所不可能。追维作始,发扬踔厉,不可不有功德之纪。余昔由陕北而南,赴关中主革命军事,过中部县\*曾谒于陵下。兹因动念,约友人将黄帝功德之见于载籍者,撮要录次,即名为《黄帝功德纪》。凡书所有,类多列之。由是以为征考断定,则史家之职也。夫祖德之述,在美盛德之形容。吾民族既有此疆土文物历史矣,其道大光,责无旁贷,重践吾民族东来之路。兹献一编,愿念兹在兹名言兹在兹也。

中华民国二十四年三月 于右任 谨序于南京

<sup>\*</sup>中部县即今陕西省黄陵县。

# 目 录

	序	
	黄帝之世家	(1)
	黄帝与中华民族	(10)
	黄帝与中国文化	(28)
	黄帝之政绩	(41)
•	黄帝之仙化与陵墓	(51)
	附	
	黄帝本纪	(83)
	中部县八景	(85)
	说明	(86)



# 黄帝之家世

# 一、父母

《国语·晋语》,"昔少典娶于有蟒氏,生黄帝。" 《史记·五帝本纪》:"黄帝者,少典之子,姓公孙, 名曰轩辕。生而神灵,弱而能言,幼而徇齐,长而敦敏, 成而聪明。"

《帝王世纪》: "黄帝,少典之子,姬姓也。母曰附宝,见大电绕北斗枢星,照郊野,感附宝,孕二十四月,生黄帝于寿丘,长于姬水,有圣德,受国于有熊,居轩辕之丘,故因以为名,又以为号。"

《河图握拒》: "黄帝,名轩,北斗黄神精,胸文 曰黄帝子。"

《拾遗记》: "轩辕出自有熊之国,母曰昊枢,以 戊己之日生,故以土德王也。时有黄星之祥。"

《通鉴外记》:"黄帝,有熊国君少典之子,姓公孙,名轩辕,生于寿丘,长于姬水,改姓姬。"

《轩辕黄帝传》: "轩辕黄帝,姓公孙,有熊国君少典之次子也。其母西桥氏女,名附宝,瞑见大电光绕北斗枢星,照于郊野。附宝感之而有娠,以枢星降,又名天枢。怀二十四月,生轩辕于寿丘。帝生而神灵,幼而徇齐,弱而能言,长而敦敏,成而聪明,龙颜日角,河目隆颡,苍色大肩,始学于项,长于姬水。"

《路史·疏仡纪·黄帝》: "黄帝有熊氏,姓公孙,名茶,一曰轩。轩之字曰玄律。少典氏之子,黄精之君也。母吴枢曰符葆,秘电绕斗轩而震,二十有四月而生帝于寿丘,故名曰轩。生而紫气充房,身逾九尺,附函挺朵,修髯花瘤,河目隆颡,日角龙颜。生而神灵,鳘(编者按:疑为"弱"字)而能言,幼慧齐,长敦敏,知幽明生死之故。少典氏没,后轩嗣立,成为姬姓,并谋兼智,明法天明,以使民心一,四国顺之,于是开国于熊。"

《陕西通志·帝系》(雍正本): "有熊氏,少典氏之子,王承填而土行,色尚黄,天下号之黄帝。身玉十二战,而天下大服。乃达四面,广能贤,稽功务法,秉数乘刚,而都于陈、今宝鸡故陈仓。姚睦云:'黄帝都陈仓,非宛丘。'故今陇右,黄帝遗迹甚多。"

# 二、妃嫔

《史记·五帝本纪》:"黄帝……娶于西陵之女,

是为嫘祖。嫘祖为黄帝正妃。"

《帝王世纪》: "元妃, 西陵氏女, 曰嫘祖, 生昌意。次妃, 方雷氏女, 曰女节, 生青阳。次妃, 彤鱼氏女, 生夷鼓, 一名苍林。次妃, 嫫母, 班在三人之下。"

《汉书·古今人表》: "彤鱼氏生夷鼓,嫫母生苍林。"

《图书集成》第五四六卷: "中部县轩辕帝后祠, 在城北五十里回军山上。传帝北巡,携四妃至此,土人 立祠以祀之。"

《路史·疏仡纪·黄帝》:"元妃西陵氏,曰憬祖。……次妃方景氏,曰节。……次妃彤鱼氏。……次妃嫫母,貌恶德克,帝纳之曰:'属女德而弗忘,与女正而弗襄,虽恶何伤!'"

《吕氏春秋》: "人之于色也,无不知悦美者,而美者未必遇也。故嫫母执于黄帝,黄帝曰:'属女德而弗忘,与女正而弗襄,虽恶何伤!"

《列女传》: "黄帝妃嫫母,于四妃之班居下,甚 丑而最贤,心每自退。"

《轩辕黄帝传》: "帝娶 西陵 氏,曰 嫘 祖,为元妃。……少昊,黄帝之小子也,帝妃女节所生。……帝又纳丑女号嫫母。……又纳费修 氏 为 夫 人。……纪、钟、甄、声,帝之四妃也。"

《玉房秘诀》: "彭祖曰:'黄帝御千二百女而登

## 三、子 孙

《国语·晋语》: "黄帝之子二十五人,其同姓者二人而已。唯青阳与夷鼓为己姓。青阳,方雷氏之甥也。夷鼓,彤鱼氏之甥也。其同生而异姓者,四母之子,别为十二姓。凡黄帝之子二十五宗,其得姓者十四人,为十二姓: 姬、酉、祁、己、滕、蔵、任、苟、僖、姞、儇、依是也。唯青阳与苍林氏同于黄帝,故皆为姬姓。"

《史记·五帝本纪》,"黄帝二十五子,其得姓者十四人。……嫘祖为黄帝正妃,生二子,其后皆有天下。其一曰玄嚣,是为青阳,青阳降居江水。其二曰昌意,降居若水。昌意娶蜀山氏女,曰昌仆,生高阳。"

《黄帝龙首经序》:"黄帝将上天,次召其三子而告之曰:'吾昔受此龙首经于玄女。'……三子拜受而起,龙忽腾翥。三子仰瞻,尚见龙头矣,遂以名其经曰《龙首》云。"

《黄帝金匮玉衡 经》: "黄帝曰:'吾 授 汝 此图《金匮玉衡经》,二子秘之。苟非其人,道不虚行。'"

《轩辕黄帝传》: "帝娶西陵氏于大梁, 曰嫘祖, 为元妃,生二子: 玄嚣、昌意……。帝又纳丑女,号嫫母, 使训人而有淑德, 奏六德之颂。又纳费修 氏 为 夫 人。 ……纪、钟、甄、声、帝之四妃,生二十五子,得姓者 十二人: 姬、酉、祈、己、滕、葳、任、苟、僖、诸、 旋、依。黄帝九子,各封一国。元妃嫘祖生二子玄 嚣、昌意,并不居帝位。玄嚣得道为北方水神,昌意居 弱水。弟少昊, 黄帝之小子也, 帝妃女节所生, 号金天 氏,后居帝位。黄帝之女溺于东海,化为鸟,名精卫, 常衔西山木石以堙东海。昌意娶蜀山氏之女生颛顼,居 帝位号高阳氏, 黄帝之嫡孙也。黄公拓跋, 昌意之少子 也, 封北土。禺强, 黄帝之胤, 不居帝位, 亦得道居北 方,为水神。少昊有子七人,颛顼以其一子有德业,赐姓 曼氏, 余不闻。……帝之子少昊, 名挚, 字青阳, 号金 天氏,居位八十一年,都曲阜。子孙相承,共四百年。 黄帝之孙颛顼, 号高阳氏, 母蜀山氏所生, 有圣德, 居 帝位七十八年,都商邱。帝喾高辛氏,黄帝之曾孙也。帝 辔生而神灵, 自言其名, 居帝位七十年, 寿一百五岁, 都偃师。帝尧陶唐氏,黄帝之玄孙,帝喾之子也,姓伊 祁,字放勋,兴于定陶,以唐侯为帝,在位七十年,寿 一百一十八岁, 都平阳。舜有虞氏, 黄帝九代孙, 姓申 屠, 摄帝位三十年整, 居位五十年, 寿一百一十二岁, 都蒲坂。夏禹, 亦黄帝之玄孙也, 姓姒, 居帝位, 都安 邑,在位九年,子孙相承,共四百三十二年。……殷 汤,黄帝十七代孙,姓子,都亳,在位一十三年,子孙 相承共六百二十三年。周发,黄帝一十九代孙,姓姬, 居帝位六年,都镐京,后平王迁洛邑,子孙相承共八百 七十三年。黄帝子孙各得姓于事,帝推律定姓者十二, 九子各封一国。总三十三氏,出黄帝后。《先天纪》 云: '子孙相承,凡一千五百二十年。'"

《路史·疏仡纪·黄帝》: 黄帝"……子二十五, 别姓者十二, 祈、酉、滕、藏、任、苟、釐、结、 儇、依,及二纪也,余循姬姓。元妃西陵氏,曰儽祖, 生昌意、玄嚣、龙苗。昌意就德, 逊居若水, 有子三 人,长曰乾荒,次安,季悃。乾荒生帝颛顼,是为高阳 氏。安处西土,后曰安息,汉来复者为安氏延李氏。悃 迁北土, 后为党项之辟, 为拓跋氏。至郁律二子, 长 沙莫雄, 次什翼犍, 初王于代, 七子。其七窟咄生魏帝 道武,始都洛为元氏。十五世百六十有一年,周齐灭 之。有党氏、奚氏、达奚氏、乞伏氏、纥骨氏、什氏、 乾氏、乌氏、源氏、贺拔氏、拔拔氏、万俟氏、乙族氏、秃 发氏、周氏、长孙氏、车非氏、兀氏、郭氏、俟亥氏、 车焜氏、普氏、李氏,八氏十姓,俱其出也。拓跋思敬镇 夏,以讨巢功,赐李姓。有拓跋仁福者,为番部都指挥 使, 亦从其姓, 将吏迎为州师。子彝超、彝兴, 继有夏、 银、绥、宥地。玄嚣姬姓,降居泜水,生帝喾,是为高 辛氏。龙苗生吾融,为吾氏。吾融生卞明,封于卞,为卞 氏。卞明弃其守降之。南裔生白犬,是为蛮人之祖。帝之 南游, 西陵氏殒于道, 式祀于行, 以其始蚕, 故又祀先 蚕。次妃方纍氏曰节,生休及清。休继黄帝者也,是为 帝鸿氏。清次封。清为纪姓,是生小昊。次妃彤鱼氏,

生挥及夷彭。挥次十五王造弧矢, 及司 率 罟, 受 封 于 张, 为弓氏、张氏、李氏、灌氏、叱罗氏、东方氏。夷 彭, 纪姓,其子始封于采,是为左人,有采氏、左人氏、 夷鼓氏。次妃嫫母, 貌恶德克, 帝纳之曰: '属女德而 弗忘,与女正而弗襄,虽恶何伤!'是生苍林、禺阳。 禺阳最少,受封于任,为任姓。谢、章、舒、洛、昌、 契、终、泉、卑、禺, 皆任分也, 后各以国令氏。禺号 生禺京、徭梁、儋人。京居北海,号处南海,是为海 司,有禺强氏、强氏。儋人,任姓,生牛黎。徭梁生番 禺, 番禺是始为舟。(番禺)生奚仲,奚仲生吉光,是主为 车,建侯于薛。又十二世仲虺,为汤左相,始分任。祖 己七世成迁为挚,有女归周,是诞文王。逮武为世,复薛 侯, 后灭于楚, 为薛氏、蘖氏、且氏、祖氏、奚氏、嵇 氏、仲氏、挚氏、执氏、畴氏、伾氏、丕氏、邳氏、伾氏、 经氏、 李氏、徐氏。终古,夏太史乘乱归商,为佟氏、谢氏。谢 之后又有射氏、大野氏。苍林, 姬姓, 生始均, 是居北 狄为始氏。结姓伯儵, 封于南燕, 后有吉氏、姞氏、孔 氏。密须、阚、允、蔡、光敦、偪、燕、鲁、雍、断、 密、虽,皆结分也。箴、济及滑, 箴姓分也, 后合以国令 氏。有虞氏作,封帝之后,一十有九侯伯, 其得资者为资 为寇氏、口引氏、刘氏。国于郦者为郦氏、俪氏, 食其 氏, 侍其氏。国于翟者为翟氏、维氏、狄氏, 于詹者为 詹氏。自詹移葛,则为葛氏、詹葛氏。髡氏依之分,狂犬

任之种也。后武王克商,求封帝之裔于前,以复契,又有前 氏、桥氏、乔氏、陈氏、苍林氏、有熊氏、轩氏、轩辕 氏、陈氏。洛之后又有落氏、雒氏。阚之后又有监氏。 密须之后又有须氏。舒之后又有舒子氏、纪氏。"

《本行记》: "黄帝居代总一百一十年,在位一百 年。……黄帝之子昌意居弱水。昌意之弟少昊,帝妃女 节所生也。帝之女溺于东海, 化为鸟, 名曰精卫, 常衔 西山木石以堙东海焉。少昊名挚,字青阳,即帝位号 金天氏, 黄帝之子也。颛顼高阳氏, 黄帝之孙也, 有圣 德, 在位七十八年, 年九十八岁, 母蜀山氏, 都商丘濮 阳。禺强, 黄帝之胤, 颛顼之子, 与颛顼俱得道。颛顼 为玄冥, 禺强为北方水神。帝喾高辛氏, 黄帝之孙。帝 生而神灵, 自言其名, 都偃师, 在位七十年, 年一百五 岁。帝尧陶唐氏,黄帝玄孙,姓伊祁,名放勋,兴于定 陶, 以唐侯为帝, 都于平阳, 在位九十八年, 年一百一 十八岁。帝舜有虞氏,姓姚,名重华,黄帝八代孙, 都蒲坂, 年百岁, 得道登遐于九疑之山。 夏禹号夏后 氏, 黄帝玄孙, 姓姒, 名文命。殷汤, 黄帝十七代孙。 黄帝子孙各得姓于事,帝吹律定姓者十二。少昊有子姓 曼,颛顼姓姬,尧姓伊祁,舜姓姚,禹姓姒,汤姓 子。"

《山海经》,"黄帝生禺號,禺號生禺京。禺京处 北海,禺號处东海,是为海神。""帝俊生禺号,禺号生淫 梁,淫梁生禺番,是始为舟。禺番生奚仲,奚仲生吉 光,吉光是始以木为车"。"有儋耳之国任姓","禺号子食谷"。"有牛黎之国,有人无骨,儋耳之子"。 "有无继民……任姓。无骨子食气鱼"。又"有无肠之国,是任姓。无继子食鱼"。"黄帝生苗龙,苗龙生融吾,融吾生弄明,弄明生白犬。白犬有 牝 牡,是 为 犬戎,肉食。有赤兽,马状,无首,名曰 戎 宣 王 尸"。 "有北狄之国。黄帝之孙曰始均,始均生北狄"。

《春秋命历序》: "黄帝传十 世,一 千 五百 二十 岁。"

# 黄帝与中华民族

# 一、战 争

《左传》僖二十五年: "遇黄帝战于阪泉之兆"。《周书》: "昔天之初, □作二后, 乃设建典命。赤帝分正二卿, 命蚩尤于宇, 少昊以临四方, 司□□上天, 莫成之庆。蚩尤乃逐帝, 争于涿鹿之 阿, 九隔 无遗。赤帝大慑, 乃说于黄帝, 执蚩尤杀之于中冀, 以甲兵释怒。用大正顺天, 思序纪于大帝, 用名之曰绝辔之野。乃命少昊请司马鸟师以正五帝之官, 故曰质天用大成,至今不乱。"

 作乱,不用帝命。于是黄帝乃征师诸侯,与蚩尤战于涿鹿之野,遂擒杀蚩尤。而诸侯咸尊轩辕为天子,代神农氏,是为黄帝。天下有不顺者,黄帝从而征之,平者去之。"

《帝王世纪》: "又征诸侯,使力牧、神皇直讨蚩尤氏,擒于涿鹿之野,使应龙杀之于凶黎之丘。凡五十二战,而天下大服。"

《归藏》: "蚩尤出自羊水,八肱,八趾,疏首,登九淖以伐空桑。黄帝杀之于青丘,作《㭎古之曲十章,一曰雷震惊,二曰猛虎骇,三曰鸷鸟击,四曰龙媒蹀,五曰灵夔吼,六曰雕鹗争,七曰壮士夺志,八曰熊罴哮吼,九曰石荡崖,十曰波荡壑。"

《龙鱼河图》: "黄帝时,有蚩尤,兄弟八十一人,并兽身人语,铜头铁额,食砂石子,造立兵杖、刀戟、大弩,威震天下,诛杀无道,不仁慈。万民欲令黄帝行天子事,黄帝仁义,不能禁蚩尤。黄帝仰天而叹,天遗玄女授兵信神符,制伏蚩尤,帝因使之主兵以制八方。蚩尤没后,天下复扰乱,黄帝遂画蚩尤形象以威天下。天下咸谓蚩尤不死,八方万邦皆为弭服。"

《玄女兵法》: "蚩尤幻变多方,征风召雨,吹烟喷雾,黄帝师众大迷。帝归息太山之阿,昏然忧寝,王母遣使者被玄狐之裘,以符授帝。佩符既毕,王母乃命九天玄女授帝以三宫五音阴阳之略,太乙遁甲六壬步斗之术。阴符之机灵,实五符五胜之文,遂克蚩尤于中

冀。"

《春秋元命苞》:"蚩尤虎卷,威文立兵。"

《黄帝内传》: "黄帝伐蚩尤,玄女为帝制夔牛鼓八十面,一震五百里,连震三千八百里。玄女为帝制司南车当其前,记里鼓车居其右。"

《山海经》: "东海中有流波山,入海七千里。其上有兽,状如牛,苍身而无角,一足,出入水则必风雨。其光如日月,其声如雷,其名曰夔。黄帝得之,以其皮为鼓,橛以雷兽之骨,声闻五百里,以威天下。"

《古今注》:"黄帝与蚩尤战涿鹿之野,常有五色云气,金枝玉叶于帝上。有花葩之象,故因而作华盖也。"

《山海经》:"蚩尤作兵伐黄帝,黄帝乃令应龙攻之冀州之野。应龙畜水,蚩尤请风伯雨师纵大风雨,黄帝乃下天女曰魃,雨止,遂杀蚩尤。魃不得复上,所居不雨。叔均言之帝,后置之赤水之北。叔均乃为田祖。魃时亡之所,欲逐之者令曰:'神北行!'先除水道,决通沟渎"。"应龙处南极,杀蚩尤与兮父,不得复上,故下数旱。旱为应龙之状,乃得大雨。"

《拾遗记》: "昆吾山,其下多赤金,色如火。昔 黄帝伐蚩尤,陈兵于此地,掘深百尺,犹未及泉,惟见火光如星,地中多丹,炼石为铜,青色而利。"

《盐铁论》: "轩辕战涿鹿,杀两降、蚩尤而为帝。"

《通鉴外纪》: "蚩尤最为暴,莫能伐。炎帝欲侵诸侯,诸侯咸归轩辕。轩辕修德振兵, 治五气,艺五种,抚万民,度四方,教熊罴貔貅䝙虎,与炎帝战于阪泉之野,三战然后得志。蚩尤作乱,不用命,轩辕征师与蚩尤战于涿鹿之野,遂擒蚩尤于中冀,名其地曰绝辔之野。制阵法,设五旗五麾,天下不顺者从而征之。"

《轩辕黄帝传》: "既擒蚩尤,乃迁其庶类,善者于 邹屠之乡,其恶者以木械之,杀蚩尤于黎山之丘。"

《史记·五帝本纪》: "北逐荤粥……迁徙往来无常处,以师兵为营卫。"

《国语·晋语》: "昔少典娶于有矫氏,生黄帝、炎帝。黄帝以姬水成,炎帝以姜水成。成而异德,故黄帝为姬,炎帝为姜。二帝用师以相济也,异德之故也。"

《轩辕黄帝传》: "黄帝又与榆罔争天下。榆罔恃神农之后,故争之。黄帝始以雕、鹗、鹰、鹯为旗帜,以熊、罴、䝙、虎为前驱,战于阪泉之野,三战而后克之。帝又北逐獯鬻之戎,诸侯有不从之者,帝皆率而征之。凡五十二战,天下大定。"

《黄帝内传》: "黄帝斩蚩尤,蚕神献丝,乃称织维之功。"

《拾遗记》: "轩辕去蚩尤之凶,迁其民善者于邹 屠之地,迁恶者于有北之乡。其先以地名族,后分为邹 氏、屠氏。"

《山海经》: "蚩尤所弃其桎梏,是为枫木。"

《皇览》: "蚩尤冢在东平郡寿张县关乡城中,高七尺,民常以十月祀之。有赤气出,如绛帛,民命者为蚩尤旗。"

《路史·疏仡纪·黄帝》: "炎帝氏衰,蚩尤惟始作乱,赫其火弹以逐帝。帝弗能征,乃帅诸侯贵于后,爰及风后、力牧、神皇之徒,较其徒旅,以曷小颢而弭火灾,得一奉宸。乃临盛水,录龟符,纳三宫五意之机,受八门九江之要,衍握奇以为式,故五旗、五麾、六毒而制其阵。年三十七,戮蚩尤于中冀。于是炎帝诸侯咸进委命,乃即帝位,都彭城。"

《太白阴经》: "帝征蚩尤,七十一战,不克。昼梦金人引领长头,玄狐之裘,云: '天帝使授符。得兵符,战必克矣!'帝寤,问风后,曰: '此天应也。'乃于盛水之阳,筑坛祭太牢。有玄龟含符致坛,似皮非皮,似绨非绨,广三尺,袤一尺,文曰'天一在前,太乙在后'。帝再拜受,于是设九宫,置八门,布三奇六仪,制阴阳二遁,凡千八十局,名曰天一遁甲式。三门发,五将具,征蚩尤而斩之。"

# 二、游历及外人来贡

《史记·五帝本纪》:黄帝"东至于海,登丸山,

及岱宗。西至于空桐,登鸡头。南至于江,登熊、湘。北逐荤粥,合符釜山……"。

《新书》:"黄帝曰:道若川谷之水,其出无已,其行无止,故服人而不为仇,分人而不蹲者,其惟道矣。故播之于天下而不忘者,其惟道矣。是以道高比于天,道明比于日,道安比于山,故言之者见谓智,学之者见谓贤,守之者见谓信,乐之者见谓仁,行之者见为圣人。故惟道不可窃也,不可以虚为也。故黄帝职道义,经天地,纪人伦,序万物,以信与仁为天下先,然后济东海入江内,取绿图西济积石,涉流沙登于昆仑,于是还归中国,以平天下。天下太平,唯躬道而已。"

《抱朴子》: "黄帝东到青丘,过风山见紫府先生,受三皇内文,以劾召万神,南到圆、陇荫、建木,观百谷之所登,采若乾之华,饮丹辔之水,西见中黄子受九如之方,过洞庭,从广成子受自然之经;北到洪堤,上具茨,见大隗君黄盖童子,授神芝图,还陟王屋得神丹金诀;到峨嵋山,见天皇真人于玉堂。黄帝生而能言,役使百灵,可谓天授自然之体者也;犹不能端坐而得道,故陟王屋而受丹经,到鼎湖而飞流珠,登崆峒而问广成,之具茨而事大隗,适东岱而奉中黄,入金谷而资滑子,论导养而质玄素二女,精推步则访山稽、力牧,讲占候则询风后,著体诊则受岐雷,审攻战则纳五音之策,穷神奸则记白泽之辞,相地理则书青鸟之说,救伤殓则缀金冶之术;故能毕该秘要,穷道尽真,遂乘

龙以高跻,与天地乎罔极也。"

《轩辕本纪》: "帝登恒山于海滨,得白泽神兽能言,通于万物之情,因问天下鬼神之事,令写为图,作视邪之文以视之。"

《宋符瑞志》: "黄帝时巡狩至于东海滨,泽兽出能言,达知万物之情,以戒于民,为时除害。 贤君明德,幽远则来。"

《春秋合诚图》,"黄帝游于玄扈、洛水上,与大司马容光等临观,凤凰衔图置帝前,帝再拜受图。"

《拾遗记》: "帝使风后负书,常伯荷剑,旦游洹流,夕归阴浦,行万里而一息。"

《庄子》:"北门成问于黄帝曰:帝张《咸池》之乐,于洞庭之野?"

《尚书中候》: "黄帝巡洛,龟书赤文,成字象轩。"

《庄子》:黄帝"闻广成子在于空同之上,故往见之"。

《泰壹杂子》:"黄帝谒峨嵋,见天真皇人拜之。"

《路史·疏仡纪·黄帝》: "十有五年,帝喜天下之戴己,乃养正命,娱耳目,昏然,五情爽惑。于是放万机,舍宫寝,而肆志于昆台。方明执舆,昌寓参乘,张若、诏朋前马,昆阍、滑稽后车,风后、柏常从负书剑。发轫紫宫之中,涉洹沙而届阴浦,陟王屋而受丹

经,登空桐而问广成,封东山而奉中华君,策大面而礼 宁生,入金谷而咨涓子心,访大恢于具茨,即神牧于相 成,升鸿堤受神芝于黄盖,遂盍群神大明之虚,而投玉 策于钟阴。"

《易林》: "黄帝出游,驾龙乘凤,东上太山,南游齐鲁,邦国咸喜。"

《符子》:"黄帝将适昆虞之丘,中路逢容成子,乘翠华之盖,建日月之旗,骖紫虬,御双鸟。黄帝命方明、游路谓容成子曰:'吾将钓于一壑,栖于一丘。'"

《路史·疏仡纪·黄帝》: "乃抚万灵,度四方,乘龙而四巡。东薄海,禅凡山; 西逾陇,款笄屯;南入江内,涉熊、湘;北届浡碣,南临玄扈。乃开东苑,被中宫,诏群神授见者,齐心服形以先焉。作清角乐,大合而乐之,鸣鹤翱翔,凤凰蔽日,于是合符于釜山,以观其会。"

《穆天子传》: "辛酉,天子升于昆仑之丘,以观 黄帝之宫。"

《庄子》:"黄帝游乎赤水之北,登乎昆仑之丘而南望。还归,遗其玄珠。使知索之而不得,使离朱索之而不得,使喫诟索之而不得。乃使象罔,象罔得之。黄帝曰:'异哉!象罔乃可以得之乎?'"

《吕氏春秋》:"昔黄帝令伶伦作为律。伶伦自大夏之西,乃之阮隃之阴"。

《黄帝内经》: "帝既与王母会于王屋。"

《列子》: "黄帝昼寝,而梦游于华胥氏之国。华胥氏之国,在弇州之西,台州之北,不知斯齐国几千万里,盖非舟车足力之所及,神游而已。"

《山海经》: "轩辕之国……不寿者乃八百岁。在女子国北,人面蛇身,尾交首上。"

《淮南子》: "黄帝治天下……诸北、儋耳之国, 莫不献其贡职。"

《尸子》: "四邦之民,有贯匈者,有深目者,有 长肱者,黄帝之德尝致之。"

《宋符瑞志》:"黄帝时,南夷乘白鹿来献鬯。"

《轩辕黄帝传》: "帝所理天下,南及交趾,北至幽陵,西至流沙,东及蟠木。"

### 三、子孙散布

黄帝子孙所封之国,据《路史·国名纪》所载,共 七十国,兹列于(左);

少典

有熊 "帝之开国,今郑之新郑。《舆地广记》云: '古有熊国,黄帝所都。'"在今河南。

寿丘 "在兖之曲阜东北六里,高三丈,今仙源。 (《广记》云黄帝所生之地,此本《史记·索隐》。皇 甫谧说在鲁东门外。)"在今山东。 陈 "今凤翔宝鸡故陈仓有陈山,非宛邱。"在今 陕西。

昌 "昌意后"。

若水 "昌意国,今越巂之台。《登盟会图》疏以 为都,故《世本》云'允姓国,昌意降居为侯',非也。" 在今四川。

安息 "安之后"。

党项 "悃之后"。

江水 "玄嚣国,若之下流泜水也。今蜀州。"在 今四川。

卞 "卞明国,汤代有卞随……今泗水县有卞故城, 汉属鲁国。"在今山东。

蛮人 "龙亩之裔,今湖南北、桂林等处皆是, 辰、澧、沅、湘之间尤盛。"在今湖南、广西等处。

清 "少昊父封。"在今山东。

张 "挥之封。然黄帝臣,自有张若。故河东解有 张阳城,汉之东张,今邢之任县是。(《通典》云:'汉 张县地。')《纪年》:'齐师逐郑太子齿奔城张阳。'南 郑是也。"在今山西、河南、河北等地。

采 "纪姓,夷彭子,故左人地,今中山之北平。" 今在河北。

北狄 "始均之裔。"在今蒙古。

资 "《陈留风俗传》云:'资姓,黄帝后。'《姓纂》云:'益州资中,今资州。资阳有资川江。'然古资阳

城在简之阳安(祁之无极有资河,卫之北纠山),而潭之益阳有资水(出县北流入资口,即益水。郦云:即资水之殊口。武冈又有资水出唐。)或其派裔。"在今四川。

彫 "《潜夫论》:'詹、资、彫、翟,黄帝后。'故《玉篇》云'资、彫故国,黄帝后,封 在 岐 山 之 阳,所谓'周原朊朊'者。顾伯邶云:'昌 意 后,止于 夏 商问。'"在今陕西。

虔 "《风俗通》:'虔氏出黄帝。'与《陈留传》 同。今河东闻喜、虔聚是。"在今山西。

寇 "在郑有寇水,北行唐。今莫之任丘西一里,有寇水枯渎。《陈留传》,'寇氏自黄帝出。'"在今河南。

郦 "故南阳。郦音尺。今内乡菊潭镇也。"在今河南。

翟 "北地古翟国,后徙西河。《盟会图》云: '今慈州。'(《地道记》:'伐卫懿公者。'贾逵云: '处北地,后为晋所灭。'此春秋时隗姓。)"

詹 "周有詹父(庄公十八年《传》)、詹柏伯(昭公九年) 圻内地,与楚詹尹异。"在今安徽。

葛 "《郡国志》:'高阳有葛城。'今郑西北有葛乡城,一名依城,汉高阳地。然葛乡故葛城,乃在宁陵北十五,郾城北三十,周四里,去亳城百里,即葛伯国。(《说文》: 鄭,南阳阴乡。郾城隶许宁国,本属

应天,今隶拱、应劬、杜佑、乐史等并云古葛伯国都), 非嬴姓之葛。"葛在河南。

髦氏 "依姓。《山海经》: '髦民国近积石。'" 在今青海。

狂犬 "黄帝后,任姓分。见《潜夫论》。"

鄭 "葪也,中绝。武王复继之,记皆为祝。祝, 尧后。"

桥 "侨即称桥也,葬于桥,因食其地,以世祀者……《唐表》:'桥,姬后。'"在今陕西。

祈 "蕲也,欧阳修《祁公铭》以'祁为黄帝之子所 封',非也。祁,少昊后。祈,黄帝后。"在今山西。

酉 "即酉阳,今黔之彭水,汉酉阳也,有酋水。" 在今四川。

滕 "今徐之西南十四,有故滕城(古 蕃 县 小 邾国)……《纪年》'越王朱句二十年灭滕'是也。"在今山东。

蔵 "卫有铖 (成公六年), 邵氏《姓解》作箴, 皆音针。"在今河南。

任 "禹阳国。仓颉为任大夫。晋邑,今之任县。" 在今河北。

苟 "战国有苟变,子思荐之(能将五百乘,荐之 卫侯)。《程氏世谱》以河内多杞氏焉,妄也。"在今山 西。

釐 "僖也。齐国釐城,为来音。简王十二年、舒

庸人道吴围巢及釐虺。"在今安徽。

信 "佶,是见诗。《风俗通》云:'殷时侯国,一作吉。'《潜夫论》云:'郅与姞同而字异。'周封女姞氏于南燕,邓名世以《潜夫》为误,非也。《说文》'佶'为正。"在今山西。

儇"与嬛同音, 暄轻也。《集韵》音旋, 非。"

依 "史伯说十邑有依、畴、历、萃,皆郐邑,后 属郑。韦昭云'国'。"在今河南。

纪(剧) "剧是,今齐之临朐东寿光西南故剧城, 汉之剧县。郑樵云:'纪后迁剧,所谓朐剧。'云纪、剧 声讹,非也。"在今山东。

滑 在今河南。

济 在今河南。

奚 "郑樵云:'鲁奚邑。'今徐之滕东南六十青丘村有奚公冢、奚公山。阳晔《徐州记》云:'仲 造车辙存焉'。"在今山东。

薛 "侯爵(庄公三十一年), 吉光国。今滕东南 五十里有故薛城, 故汉县, 战国属齐为徐州, 秦为薛 郡, 有仲祠, 或曰大薛。"在今山东。

伍 "邳也,今淮阳治下邳城。汉下邳国,梁下邳郡,周邳州,唐隶泗城三重,处泗、沂之会。有仲虺祠。 (《寰宇记》:'祠在徐之沛。'有仲虺城。 见《九域志》。)郑樵云'仲虺居在薜,鲁奚仲迁 邳,后 以邳为 薛'妄。"在今江苏。 挚 "祖己七世孙。成封周文王母太任国。今蔡之 平與有挚亭。"在今河南。

谢 "欧阳修《谢绛铭》云:黄帝后者,周灭之,以封申伯,在南阳之宛,见《诗·崧高》。其地西甚广,郑公友言'谢西之九州者',二千五百家者也。"在今河南。

章 《章与谢,本皆任姓,周始以封太公之支子。"在今河南。

舒 "春秋之留舒,去谷七里,亦曰柳舒。故城在郓之须城,许氏作斜。邻,邾之下邑(《说文》'邾在薛县')。"在今山东。

洛 "周书之有洛氏, 史伯云'北有路、洛、泉、徐、浦', 韦昭云'皆赤狄', 宜于此异。或 作 络(卫贤者络疑)。雒广, 汉属县。"在今河南。

昌 "春秋,昌间多在河东北。"在今河北。

薊 "今范阳治地多薊。《水经注》:'薊城 西 北 隅, 薊丘为名。'《班志》云:'薊, 故燕 国 名。'"在 今河北。

终 "商有终古,宜即佟后有佟氏、佟通。今襄阳 有泈水。"在今湖北。

泉 "洛阳西五十故伊关县北有泉亭,周世狄居之,俗呼前亭。(伊拒泉皋是也。昭二十二年有前城。)" 在今河南。

卑 "宜晋郫邑,一曰郫邵(文元年)。绛之垣东

九十有郫邵, 陇卑氏所出, 非越雋。"在今山西。

遇 "禺也,宜即番禺。鲁襄公救 成 至 遇 (十 五 年)。鲁邑近成,然非必禺。"在今山东。

儋 "《山海经》: 儋人任姓。今儋州, 周有儋翩。"在今广东。

牛黎 "《经》云'牛黎之国,儋人之子儋',今有黎姥山。"在今广东。

番禺 "贲隅也。兮清海之属县有禺山。《传》云'禺号南海',故予谓此即禺。《经》文有无肠、继无之国,皆任姓。"在今广东。

南燕 "伯爵。伯儵国,后稷妃南燕姞氏也(石癸 曰'吾闻姞姓后稷元妃')。今滑之胙城东 北, 汉 南 燕 县,隋改曰胙。"在今河北。

密须 "子爵。《世本》云:'商有密须,文王伐之。'(《晋志》云:'商侯国。')鲁有密须之鼓。杜 预谓姞 姓 国,在安定阴密,今泾之灵台也。"在今陕西。

阚 "子爵。今郓之寿张有阚乡,而阚古城在中都。 (桓公十一年。《寰宇记》云:'今属齐之钜野。') 阚亭又在须昌东南。(即昭公末年取 阚 者,《郡 国 志》 '东平陆有阚亭,今寿张也'。)齐有阚止。"在今山东。

允 "高阳时有允格,或云少昊后,出黄帝。" 蔡 "蕲春江中有蔡山,在广济县。(《高崇文传》 蔡山,窦苹云'蕲水县北'。)大龟纳锡,故曰蔡,非姬姓蔡。"在今湖北。

光 "《春秋图》有光国, 今光州。"在今湖北。

敦 "银任、冷、敦之田, 许地也, 郑取之。《陈 留风俗传》云:'敦氏, 姞姓后。'"在今河南。

福 "晋襄公母, 偪姞国, 即周之偪阳国。"在今 河南。

燕 "伯爵。宜为东燕与南燕北(昭三 年 北 燕 伯 款亦姞姓)。"在今河北。

鲁 "汝之鲁山县,非兖地。"在今河南。

雅 "伯爵。汴之雍丘,郑庄夫人雍 姞 国。《姓纂》云:'宋之雍氏本姞姓。'《寰宇记》'雍 氏,黄 帝 后',姞姓是矣。又冀之堂阳东北三十六,亦 有 雍 氏城。《寰宇》之高堤城,本于陇切。自汉州 名 人 姓 皆 于用切。《谈苑》云'当作平 声'。昭 十 四 年 《传》:'晋尸雍子。'杜云:'阳翟东北有雍氏城者非。'"在今河 南。

断 "晋地有断道,即卷楚也。《世本》作段写误。"在今山西。

密 "河南密县东四十故密城是,武德三为密州,与 须城比,故说者谓即密须,盖亦号密须云(《史索》云 密须今河南密县,与安定姬姓密别)。"在今河南。

虽 "开封长垣近须城,是卫,在今澶之卫南二十八 里。《卫》诗所谓'思须与曹'者,由声转也。"在今河

# 四、中国各民族为黄帝之苗裔

#### 甲、鲜 卑

《晋书·载记八》: "慕容廆字弈洛瓌,昌黎棘城 鲜卑人也。其先有熊氏之苗裔,世居北夷,邑于紫蒙之 野,号曰东胡。风俗与匈奴略同。"

《魏书·序纪》: "昔黄帝有子二十五人,或内列诸华,或外分荒服。昌意少子受封北土,国有大鲜卑山,因以为号。其后世为君长,统幽都之北广漠之野……黄帝以土德王,北俗谓土为托,谓后为跋,故以为氏。"

《北史·魏本纪》:"魏之先出自黄帝轩辕氏。黄帝子曰昌意。昌意之少子受封北国,有大鲜卑山,因以为号。其后世为君长,统幽都之北广漠之野。"

#### 乙、匈奴

《国语•鲁语》: "夏后氏禘黄帝而祖颛顼,郊鲧而宗禹。"

《史记·匈奴传》: "匈奴其先祖,夏后氏之苗裔也。"

按: 夏为黄帝后, 匈奴为夏后, 蒙古为匈奴后, 是蒙古为黄帝之苗裔。

### 丙、羌

《国语·鲁语》: "有虞氏禘黄帝而祖颛顼, 郊尧

而宗舜。"

《晋书·载记十六》:"姚弋仲,南安赤亭羌人也。其先有虞氏之苗裔。禹封舜少子于西戎,世为羌酋。"

按: 虞为黄帝后, 羌为虞后, 藏为羌后, 是藏为 黄帝之苗裔。

## 丁、苗 黎

《山海经》,"黄帝生偶号,偶號生禺京。"

《路史·疏仡纪·黄帝》: "禺号生禺京、徭梁、儋人。京处北海,号处南海,是为海司。……儋人任姓,生牛黎。(注:即今儋人,故儋近有黎。) 徭梁生番禺,番禺是始为舟。"

### 戊、安 息

《路史·疏仡纪·黄帝》: 黄帝"生昌意……昌意……有子三人,长曰乾荒,次安,季悃……安处西土,后曰安息。"

《汉书·西域传》: "安息国王治番兜城,去长安万一千六百里。"

按:安息在今波斯阿拉伯土耳其,为回教发祥之地。

# 黄帝与中国文化

## 一、发明

#### (一) 衣

《世本》: "黄帝作旃冕,胡曹作冕,伯余作衣裳,于则作扉屦。"

《拾遗记》: "轩辕始造书契,服冕垂衣,故有衰龙之颂。"

《路史·疏仡纪·黄帝》:"法乾坤以正衣裳,制衰冕,设斧黻,深衣大带,扉屦赤舄,玄衣獯裳,往纩赘旒,以规际听之逸;房观翚翟,草木之化,染为文章,以明上下之衰; 祎衣褕展,以为内服,故于是有裦龙之颂。端璧瑞以奉天,委珩牙以嫮武。是以衣裳所在,而凶恶不起。"

#### (二)食

《古史考》: "黄帝始蒸谷为饭,烹谷为粥。黄帝作瓦甑。"

《世本》: "雍父作春。"

#### (三) 住

《新语》: "天下人民野居穴处,未有室屋,则与鸟兽同域,于是黄帝乃伐木构材,筑作宫室,上栋下宇,以避风雨。"

《白虎通》:"黄帝作宫室,以避寒暑,此宫室之始也。"

《黄帝内传》: "帝既斩蚩尤,因立台榭。无屋曰台,有屋曰榭。"

《路史·疏仡纪·黄帝》: "乃广宫室,壮堂庑,高栋深宇,以避风雨。作合宫,建銮殿,以祀上帝,接万灵"。"即库台,设移旅,楹复格,内阶幽陛,提唐山墙, 楠干惟工, 斲其材而砻之"。

《文中子》:"黄帝有合宫之听。"

#### (四) 行

《世本》: "骸作服牛, 共鼓、货狄作舟。"

《拾遗记》: "轩辕变乘桴以作舟楫。"

《汉书》: "黄帝作舟车以济不通,旁行者天下, 方制万里。画野分州,得百里之国万区。"

《古史考》: "黄帝作车,引重致远,少昊时略加牛,禹时奚仲加马。"

《路史·疏仡纪·黄帝》: "命邑夷法斗之周旋, 魁方标直,以携龙角,为帝车大辂,故曲其辀,绍大帝 之卫。于是崇牙交旂,羽挡掾稍,攂剑华盖,属车副 乘,记里司马,以备道哄。命马师皇为牧正,臣**胲服牛**始驾,而仆跸之御全矣。"

《通鉴外纪》:"蚩尤为大雾,军士昏迷,轩辕作指南车以示四方。"

《黄帝内传》: "玄女为帝制司南车当其前,记里 **鼓**车居**其**右。"

《古今注》: "黄帝与蚩尤战于涿鹿之野,蚩尤作大雾,兵士皆迷,于是作指南车以示四方,遂禽蚩尤,而即帝位,故后常建焉。"

#### (五) 农

《黄帝内传》:"黄帝升为天子,地献草木,述耕种之利,因之以广耕种。"

《论语纤》: "轩知地利, 九牧倡教。"

《路史·疏仡纪·黄帝》: "命西陵氏劝蚕稼。"

《黄帝内传》: "黄帝斩蚩尤,蚕神献丝,乃称织维之功。"

《路史·疏仡纪·黄帝》: "经土设井,以塞争端;立步制亩,以防不足。八家以为井,并设其中,而收之于邑。"

#### (六) 工

《路史·疏仡纪·黄帝》: "赤将为木正,以利器用。"

《列仙传》:"宁封子,黄帝时人也,为黄帝陶正。" (七) 矿

《管子》, "黄帝问于伯高曰:'吾欲陶天下 而 为

一家,为之有道乎?'伯高对曰:'请刈其莞而树之,吾 谨逃其早牙,则天下可陶而为一家。'黄帝曰:'若此言 可得闻乎?'伯高对曰:'上有丹沙者,下有黄金;上有 慈石者,下有铜金;上有陵石者,下有铅锡赤铜;上有 赭者,下有铁。'"

《拾遗记》: "昆吾山其下多赤金,色如火。昔黄帝伐蚩尤,陈兵于此,掘深百尺,犹未及泉,惟见火光如星,地中多丹,炼石为铜,铜色青而利。"

《路史·疏仡纪·黄帝》: "上有丹矸者,下有黄银;上有慈石者,下有铜金;上有陵石,下有赤铜青金; 上有代赭,下有鉴铁;上有葱,下有银沙。此山之见 荣者也。至于艾而时之,则货币于是乎成。乃燹山林, 破曾薮,楚莱沛;以制金刀,立五币,设九棘之利,而 为轻重之法。"

#### (八) 商

《路史·疏仡纪·黄帝》: "五置 而 有 市, 市 有 馆, 以竢朝聘之需。"

### (九) 货 币

《路史·疏仡纪·黄帝》:"于是立货币以制国用。"

#### (十) 文字

《世本》: "史皇作书。"

《淮南子》: "苍颉作书,而天雨粟,鬼(一作兔) 夜哭", "史皇生而能书"。

《孝经援神契》: "奎主文章, 苍颉效象洛龟, 曜

书丹青,垂荫画字。"

卫恒《书势》: "黄帝之史沮诵、仓 颉,眡 彼 鸟迹,始作书契,纪纲万事,垂法立则。"

《河图玉版》: "仓颉为帝,南巡登阳虚之山,临 于玄扈、洛汭之水,灵龟负书丹甲青文以授之。"

《春秋元命苞》: "仓帝史皇氏,名颉,姓侯冈,龙颜侈哆,四目灵光,实有睿德。生而能书,及授河图绿字,于是穷天下之变,仰观奎星圆曲之势,俯察龟文鸟羽山川指掌,而创文字。天为雨粟,鬼为夜哭,龙乃潜藏。治百有一十载,都于阳武,终葬衙之利乡亭。"

《路史·疏仡纪·黄帝》: "乃命沮诵作云书,孔 甲为史,执青纂记,言动惟实。"

《论衡》: "苍颉四目,为黄帝史。"

#### (十一)图画

《论衡》: "黄帝门户画神茶、郁垒与虎。"

《龙鱼河图》: "黄帝遂画蚩尤形象以威天下。"

#### (十二) 弓 箭

《世本》: "挥作弓,牟夷作矢。"

《古史考》:"黄帝作弩。"

《路史·疏仡纪·黄帝》: "命挥作盖弓,夷牟造 矢,以备四方。"

## (十三) 音乐

《吕氏春秋》: "昔黄帝令伶伦作为律。伶伦自大

夏之西,乃之阮隃之阴,取竹于懈谿之谷,以生空窍厚钧者,断两节间,其长三寸九分,而吹之,以为黄锺之宫。次曰舍少。次制十二筒,以之阮隃之下。听凤凰之鸣,以别十二律,其雄鸣为六,雌鸣亦六,以比黄锺之宫。适合黄锺之宫,皆可以生之,故曰黄锺之宫,律吕之本。黄帝又命伶伦与荣将铸十二锺,以和五音,以施英韶,以仲春之月,乙卯之日,日在蛮,始奏之,命之曰《咸池》。"

《世本》: "伶伦造磬。黄帝使素女鼓瑟, 哀不自胜, 乃破为二十五弦, 异二均声。"

《易是类谋》: "圣人兴起,不知姓名,当吹律听声以别其姓。黄帝吹律以定姓是也。"

《管子》: "黄帝以其缓急作五声,以政五锺。令其五锺:一曰青锺大音,二曰赤锺重心,三曰 黄 锺 洒 光,四曰景锺昧其明,五曰黑锺隐其常。五声既调,然后作立五行以正天时,五官以正人位。人与天调,然后天地之美生。"

《路史·疏仡纪·黄帝》: "伶伦造律,采解谿之篁,断篁间三寸九分,为黄锺之宫,曰含少。制十有二筒,以之阮隃之下,听凤之鸣,以定其雌,乃作玉律,以应候气,荐之宗庙,废治忽以知三军之消息,以正名百物,明民共财而定氏族。"

《路史·疏仡纪·黄帝》: "乃本阴阳, 审风声, 命荣猨铸十二锺, 以协月筒, 以诏英韶。调政之缓急,

分五声以正五锺,令其五中以定五音。伶伦造声,以谐八音。五音调以立天时,八音交以正人位,人天调而天地之美生矣。命大容作承云之乐,是为云门;大卷著之控楬,以道其和。中阳之月,乙卯之辰,日在奎而奏之,弛张合施,动静丽节,是故翕纯皦绎声而听严,五降之后而不弹矣。令曰《咸池》。"

《黄帝内传》: "黄帝伐蚩尤,玄女为帝制夔牛鼓八十面,一震五百里,连震三千八百里。"

《路史·疏仡纪·黄帝》: "岐伯鼓吹铙角, 灵鞞神钲, 以扬德建武, 厉士风敌, 而威天下。"

《黄帝内传》: "玄女请帝制角二十四以警众,请 帝铸钳铙以凝雹之声。"

《古今注》: "短箫、铙歌,军乐也,黄帝使岐伯 所作也,所以建武扬德、风劝战士也。"

《山海经》: "东海中有流波山,入海七千里,其上有兽,状如牛,苍身而无角,一足,出入水则必风雨。其光如日月,其声如雷,其名曰夔。黄帝得之,以其皮为鼓,撅以雷兽之骨,声闻五百里,以威天下。"

《归藏》:"蚩尤,黄帝杀之于青丘,作㭎鼓之曲十章:一曰雷震惊,二曰猛虎骇,三曰鸷鸟击,四曰龙媒蹀,五曰灵变吼,六曰雕鹗争,七曰壮士夺志,八曰熊罴哮吼,九曰石荡崖,十曰波荡壑。"

## (十四) 医 药

《路史·疏仡纪·黄帝》: "谓人之生也负阴而抱

阳,食味而被色,寒暑荡之外,喜怒攻之内,夭昏凶札, 君民代有,乃上穷下际,察五气,立 五 运,洞性命, 纪阴阳,极咨于岐雷而《内经》作。谨候其时,著之玉 版,以藏灵兰之室。演仓谷,推贼曹,命俞附、岐伯、 雷公察明堂,空息脉,谨候其时,则可万全。命巫彭、 桐君处方,盆饵湔澣刺治,而人得以尽年。"

《帝王世纪》:"黄帝命雷公、岐伯论经脉旁通,问难八十为难经,教制九针,著内外术经十八卷。"

## (十五)婚姻

《路史·疏仡纪·黄帝》: "氏定而系之姓, 庶姓别于上, 而戚殚于下, 婚姻不可以通, 所以崇伦类、远禽兽也。"

《通鉴外纪》:"嫁娶相媒。"

#### (十六) 丧 葬

《路史·疏仡纪·黄帝》: "乃饰棺衾以送死, 封 崇表木, 以当大事。"

## (十七) 历 数

《世本》: "大挠作甲子,容成作历,隶首作数。" 《拾遗记》: "轩辕考定历,以吹玉律正璇衡。"

《路史·疏仡纪·黄帝》: "乃设灵台,立五官,以叙五事。命臾茝茝占星,斗苞授规,正日月星辰之象。 分星次象应,著名始终相验,于是乎有星官之书。浮箭为泉,孔壶为漏,以考中星。命羲和占日,僑珥旺适, 缨纽抱负,关启亡浮;尚仪占月,绳九道之侧匿,纠五精 之留疾,车区占风,道八风以通二十四,隶首定数,以率其羡要其会,而律度量衡由是成焉。"

《隋书》: "星官之书,自黄帝始。"

## (十八) 阴阳五行

《春秋内事》: "黄帝师于风后,风后善于伏羲之道,故推演阴阳之事。"

《路史·疏仡纪·黄帝》: "大挠正甲子,探五行之情,而定之纳音。风后释之,以致其用,而三命行矣。察三辰于上,迹祸福于下,经纬历数,然后天步有常而不倍。命容成作盖天,综六术以定气象。问于鬼鬼茂曰:'上下周纪,其有数乎?'对曰:'天以六节,地以五制。周天气者,六期为备;终地气者,五岁为周。五六合者岁,三千七百二十气为一纪,六十岁千四百四十气为一周。太过不及,斯以见矣。乃因五量治五气,起消息,察发敛,以作调历,岁纪甲寅,日纪甲子,立正爻以配气,致种爻以抵日,而时节定。是岁己酉朔已,"是谓得天之纪,终而复始,爰兴封禅,迎日推策,造六十神历,积邪分以置闰,配甲子而设蔀。岁七十六以为纪,纪二十而蕲首定之,原名握先,率二十而冬至复朔。凡二十推三百八十年而策定,然后时惠而辰从。"

#### (十九) 企

《古今注》:"黄帝与蚩尤战于涿鹿之野,常有五色云气,金枝玉叶,止于帝上。有花葩之象,故因而作

#### 华盖也。"

## (二十) 镜

《黄帝内经》: "帝与王母会于王屋,乃铸火镜十二面,随月用之,则镜始于轩辕矣。"

## 二、著作

《汉书·艺文志》关于黄帝及黄帝时 人 之 著 作 如 (左):

《黄帝四经》四篇(道家)

《黄帝铭》六篇(道家)

《黄帝君臣》十篇(道家)

《杂黄帝》五十八篇(道家)

《黄帝泰素》二十篇(阴阳)

《黄帝说》四十篇 (小说)

《太壹兵法》一篇(兵、阴阳)

《黄帝》十六篇 (阴阳)

《黄帝杂子气》三十三篇(天文)

《泰阶六符》一卷 (天文)

《黄帝五家历》三十三卷 (历谱)

《黄帝阴阳》二十五卷 (五行)

《黄帝诸子论阴阳》二十五卷 (五行)

《黄帝长柳占梦》十一卷(杂占)

《黄帝内经》十八卷 (医经)

《外经》十九卷 (医经)

《泰始黄帝扁鹊俞附方》二十三卷(方经)

《神农黄帝食禁》七卷(方经)

《黄帝三王养阳方》二十卷 (房中)

《黄帝杂子步引》十二卷(神仙)

《黄帝岐伯按摩》十卷(神仙)

《黄帝杂子芝菌》十八卷 (神仙)

《黄帝杂子十九家方》二十一卷(神仙)

《力牧》二十二篇(道家)

《力牧》十五卷 (阴阳)

《容成子》十四篇 (阴阳)

《成公生》五篇(名家)

《孔甲盘盂》二十六篇(杂家)

《封胡》五篇 (阴阳)

《风后》十三篇 (阴阳)

《风后弧虚》二十卷 (五行)

《鷞冶子》一篇(阴阳)

《鬼容区》三篇 (阴阳)

《容成阴道》二十六卷 (房中)

《天老杂子阴道》二十五卷 (房中)

《帝王世纪》:"黄帝命雷公、岐伯论经脉旁通,问难八十为《难经》,教制九针,著内外《经》十八卷。"

《路史·疏仡纪·黄帝》:"河龙图发,洛龟书威,于是正坤乾,分离坎,倚象衍数,以成一代之宜。谓土

为祥,乃种坤以为首,所谓《归藏易》也。"

《乾坤凿度》: "炎帝、黄帝有易灵纬,太卜掌三易之法,一曰连山,二曰归藏。杜子春云: "连山宓戏,归藏黄帝。"

《路史·疏仡纪·黄帝》: "正日月星辰之象,分星次象应,著名始终相验,于是乎有星官之书。"

《轩辕黄帝传》: "玄女传《阴符经》三百言,帝观之十旬,讨伏蚩尤。"

黄帝又著十六神历,推太一六壬等法;又述六甲阴阳之道,作《胜负握机》之图,及兵法要诀《黄帝兵法》 三卷。

《河图出军诀》称黄帝得王母兵符又有:

《出军大帅年立成》各一卷

《太一兵历》一卷

《黄帝出军新用诀》一十二卷

《黄帝夏氏占兵气》六卷

《黄帝十八阵图》二卷

《黄帝问玄女之诀》三卷

《风后孤虚诀》二十卷

《务成子亥兵灾异占》十四卷

《鬼臾区兵法》三卷,图一卷

……收得蚩尤兵书:

《行军秘术》一卷

《蚩尤兵法》二卷

又见黄盖童子受《神芝图》七十二卷。适中岱,见中黄子,受九茄之方。……广成子乃授以《自然经》一卷。

《帝王世纪》:"黄帝因著《占梦经》十一卷。"

《平津馆丛书》有:

《龙首经》二卷

《金匮玉衡经》一卷

《玄女经》一卷

《本行经》一卷

《轩辕黄帝传》一卷

《双梅景阁丛书》有:

《素女经》一卷:

《素女方》一卷

《玉房秘诀》一卷

《归藏》: "蚩尤……黄帝杀之于青丘,作栩鼓之曲十章:一曰雷震惊,二曰猛虎骇,三曰鸷鸟挚,四曰龙媒蹀,五曰灵夔吼,六曰雕鹗争,七曰壮士夺志,八曰熊罴哮吼,九曰石荡崖,十曰波荡壑。

# 黄帝之政绩

## 一、臣友

《左传》昭十七年: "黄帝氏以云纪,故为云师而云名。"

《史记》: "官名皆以云名为云师……举风后、力牧、常先、大鸿以治民", "神农以前尚矣,盖黄帝考定星历,建立五行,起消息,正闰余,于是有天地神祇物类之官,是为五官,各司其序,不相乱也。民是以能有信,神是以能有明,德明神异,业敬而不渎,故神降之嘉生,民以物享,灾祸不生,所求不匮。"

《论语摘辅象》: "黄帝七辅,风后受金法,天老受天箓,五圣受道级,知命受纠俗,窥纪受变复,地典受州络,力墨受准,斥州选举,翼佐帝德。"

《管子》: "黄帝得六相而天地治,神明至。蚩尤明乎天道,故使为当时,大常察乎天利,故使为廪者,奢龙辨乎东方,故使士师;祝融辨乎南方,故使为司徒;大封辨乎西方,故使为司马;后土辨乎北方,故使为

李。是故春者土师也,夏者司徒也,秋者司马也,冬者 李也。"

《帝王世纪》: "黄帝以风后配上台, 天 老 配 中 合, 五圣配下台,谓之三公。其余知名、规纪、地典、力牧、常先、封胡、孔甲等,或以为师,或以为将。"

《尸子》: "子贡问孔子曰:'古者黄帝四面,信乎?'孔子曰:'黄帝取合己者四人,使治四方,不谋而亲,不约而成,大有成功,此之谓四面也。'"

《淮南子》:"黄帝治天下,而力牧、太山稽辅之,以治日月之行律,治阴阳之气,节四时之度,正律历之数,别男女,异雌雄,明上下,等贵贱,使强不掩弱,众不暴寡,人民保命而不夭,岁时熟而不凶,百官正而无私,上下调而无尤,法令明而不阍,辅佐公而不阿,田者不侵畔,渔者不争限,道不拾遗,市不豫贾,域廓不关,邑无盗贼,鄙旅之人相让以财,狗彘吐菽粟于路,而无忿争之心。"

《帝王世纪》:"黄帝梦大风吹,天下之尘垢皆去, 又梦人执千钧之弩驱羊万群。帝寤而叹曰:'风为号令,故执政者, 垢去土后在也。天下岂有姓风名后者哉! 夫千钧之弩, 异力者也; 驱羊数万,能牧民为善者也。天下岂有姓力名牧者哉!'于是依二占而求之, 得风后于海隅,登以为相,得力牧于大泽,进以为将。黄帝因著《占梦经》十一卷。"

《拾遗记》,"置四史以主图籍,使九行之士以统万

国。九行者,孝、慈、文、信、言、忠、恭、勇、义, 以观天地,以祠万灵,亦为九德之臣。"

《逸周书》: "乃令少昊请司马鸟师以 正 五 帝 之 官。"

《帝王世纪》: "又征诸侯,使力牧、神皇直讨蚩尤氏,使应龙杀之于凶黎之丘。"

《山海经》:"蚩尤作兵伐黄帝,黄帝乃令应龙攻之冀州之野。应龙畜水,蚩尤请风伯、雨师纵大风雨。黄帝乃下天女曰魃,雨止,遂杀蚩尤。"

《论语撰考谶》:"黄帝受地形象天文以制官。"

《帝王世纪》"黄帝受命,风后受图,割地布九州,置十二国。"

《论语谶》; "轩知地利, 九牧倡教。"

《论衡》: "仓颉四目,为黄帝史。"

卫恒《书势》: "黄帝之史沮诵、苍颉。"

《史记》、"黄帝得宝鼎宛朐,问于鬼臾区"。"鬼 臾区号大鸿,死葬雍,故鸿冢是也。"

《管子》: "黄帝问于伯高曰:'吾欲陶天下 而 以为一家,为之有道乎?'"

《玄女兵法》: "黄帝攻蚩尤,三年城不下,得卫士伍臂而问之。"

《庄子》:"北门成问于黄帝曰:'帝张《咸池》之乐,于洞庭之野?"

《春秋合城图》: "黄帝游于玄扈洛水上,与大司

马容光等临观。"

《河图挺辅佐》:"黄帝修德立义,天下乃治,乃召天老而问焉。"

《宋符瑞志》: "秋七月庚申,天雾三日三夜,昼昏,黄帝以问天老、力牧、容成。"

《内经·素问》:"黄帝问曰……岐伯对曰……"

《吕氏春秋》:"黄帝令伶伦作为律……黄帝又命伶伦与荣将铸十二锺。"

《庄子》: 黄帝"遗其玄珠,使知索之而不得,使 离朱索之而不得,使喫诟索之而不得也。乃使象罔,象 罔得之。"

《拾遗记》: "帝使风后负书,常伯荷剑。"

《列仙传》: "宁封子, 黄帝时人也, 为 黄 帝 陶 正。"

《列仙传》: "马师皇者,黄帝时马医也。"

《遁甲开山图》: "绛北有阳石山,有神龙池,黄 帝遣云阳先生养龙于此。"

《庄子》: "黄帝氏立巫咸, 使之沐浴斋戒。"

《博物志》: "黄帝登仙,其臣左彻者,削木象黄帝,帅诸侯以朝之。"

《纪年》: "帝以土德王,应地裂而沛葬。群臣有 左彻者,感思帝德,取衣冠几杖而庙飨之。"

《路史·疏仡纪·黄帝》: "其即位 也, 适 有 云 瑞, 因以云纪, 百官师长俱以云名。乃立四 辅、三 公、

六卿、三少,二十有四官,凡百二十官,有秩以之共理, 而视四民。"

《路史·疏仡纪·黄帝》: "令知命纠俗, 天老录 教, 力牧准斥, 鸦治决法, 五圣道级, 阙纪补阙, 地典 州络, 七辅得而天下治"。"而肆志于昆台,方明执舆,昌 寓参乘,张若、褶朋前马,昆阁、滑稽后车,风后、柏常从 负书剑"。"于是申命封胡以为丞,鬼容茂为相,力牧为 将,而周昌辅之;大山稽为司徒,庸光为司马,恒先为司 空"。"奢比辨乎东以为士师,庸先辨乎南以为司徒,大 封辨乎西以为司马,后土辨乎北以之行李"。乃设灵台、立 五官以叙五事,命臾芟芟占星,斗苞授规;命羲和占日, 尚仪占月, 车区占风, 隶首定数, 伶伦造律, 大挠正甲 子;命容成作盖天;命大容作承云之乐,大卷著之控 揭;命宁封为陶正,赤将为木正;命挥作盖弓,夷牟造 矢, 岐伯作鼓; 命邑夷法斗之周旋; 命马师皇为牧正, 臣胲服牛。乃命沮诵作云书,孔甲为史;命俞附、岐伯、雷 公、巫彭、桐君处方;命西陵氏劝蚕稼;命共鼓、化狐 作舟车; 命竖亥通道路; 命风后方割万里。

《符子》: "黄帝命方明、游路谓容成子。"

《通鉴外纪》: "举风后、力牧、太山稽、常先、 大鸿,得六相而天地治。奢龙辨乎东方,故为士师;祝 融辨乎南方,故为司徒;大封辨乎西方,故为司马;后 土辨乎北方,故为李。史官苍颉造文字。"

《路史·疏仡纪·黄帝》: "登空桐而问广成,封

东山而奉中华君,策大面而礼宁生,入金谷 而 咨 涓 子 心。访大恢于具茨,即神牧于相成。升鸿堤受神芝于黄 盖","师于大填,学于封巨、赤诵。复岐下见岐伯,引载而归,访于治道。"

《庄子》: "黄帝立为天子十九年,令行天下,闻 广成子在于空同之上,故往见之。"

《庄子》:"黄帝将见大隗乎具茨之山……适遇牧马童子问途焉。"

《春秋合诚图》:"黄帝请问太一长生之道。"

《庄子》: "知非游于玄水,适遭无为谓焉,而睹狂屈焉。反于帝宫,见黄帝而问焉。黄帝曰:'彼无为谓真是也。狂屈似之,我与汝终不近也。'"

《泰壹杂子》: "黄帝谒峨嵋,见天真皇人拜之。"

《抱朴子》: "黄帝东到青丘,过风山,见紫府先生,受三皇内文;西见中黄子,受九加之方;过洞庭,从广成子受自然之经;北到洪堤,上具茨,见大隗君黄盖童子,受神芝图;还陟王屋,得神丹金诀;到峨嵋山,见天皇真人于玉堂。"

《抱朴子》:"黄帝登崆峒而问广成,之具茨而事大隗,适东岱而奉中黄,入金谷而咨滑子,论导养而质玄素二女,精推步则访山稽、力牧,讲占候则询风后,著体诊则受岐、雷。"

《西京杂记》:"黄帝时,西王母献昭华玉琯。"《黄帝内经》:"帝既与王母会于王屋。"

《玄女兵法》: "王母遣使者以授符。王母乃命九 天玄女授帝以三宫五音。"

《龙鱼河图》: "天遣玄女下授黄帝兵信神符,制 伏蚩尤。"

## 二、功德

《鬻子》: "黄帝十岁,知神农之非而改其政。"

《国语·鲁语》:"黄帝能成命百物,以明民共财。"

《史记》: "轩辕之时,神农氏世衰,诸侯相侵伐,暴虐百姓,而神农氏弗能征。于是轩辕乃习用干戈,以征不享,诸侯咸来宾从……炎帝欲侵陵诸侯,诸侯咸归轩辕。轩辕乃修德振兵,治五气,艺五种,抚万民,度四方,教熊罴貔貅䝙虎,以与炎帝战于阪泉之野。三战然后得其志。"

《帝王世纪》: "神农氏衰,黄帝修德抚万民,诸侯咸去神农而归之黄帝。于是乃扰驯猛兽,与神农氏战于阪泉之野,三战而克之。"

《新书》: "炎帝者,黄帝同父异母兄弟也,各有 天下之半。黄帝行道,而炎帝不听,故战涿鹿之野,血 流漂杵。"

《归藏》:"黄帝与炎帝争斗涿鹿之野。将战,筮 于巫咸。巫咸曰:'果哉!而有咎。'"

《国语》: "少典……生炎帝、黄帝……成而异德

……用师以相济也。"

《史记》: "有土德之瑞,故号黄帝。"

《吕氏春秋》: "黄帝之时,天先见大蟟大蝼。黄帝曰: '土气胜。' 土气 胜,故 其色尚黄,其事则土。"

《春秋演孔图》: "黄帝之将兴,黄云升于堂。"

《春秋考异邮》: "黄帝将兴,有黄雀赤头,立日旁。帝占曰:'黄者土精,赤者大荣,雀者尚萌,余当立大功乎?'"

《春秋合诚图》:"黄帝德冠帝位。"

《万机论》: "黄帝之初,养性爱民,不好战伐, 而四帝各以方色称号,交共谋之,边 城 日 警,介 胄不 释。黄帝叹曰: '君危于上,民 不 安 于 下,一 王 失 于 国,其臣再嫁。厥疾之由,非养寇耶? 今取民萌之上, 而四道亢衡,递震于师。'于是 遂师 营垒,以灭四帝。 向令黄帝若不龙骧虎变,而与俗同道,则其民臣再嫁于 四帝矣。"

《管子》: "黄帝之治天下也,其民不引而来,不 推而往,不使而成,不禁而止。故黄帝之治也,置法而 不变,使民安其法者也。"

《轩辕黄帝传》: "耕者不侵畔,渔者不争岸,抵市不预,价市不开,鄙商 旅之人相 让以财,外户不闭,是谓大同。帝理天下十五年,忧念黎庶之不理,端聪明,进智力,以营百姓。是时,庶民甘其食,美其服,

乐其俗,安其居,无羡欲之心,邻国相望,鸡犬相闻,至老死不相往来。"

《路史·疏仡纪·黄帝》: "耕父推畔,道不拾遗, 狗彘吐菽粟,而城郭不闭,人保命而不夭,岁时熟而亡凶, 天地休通,五行期化,故风雨时节,而日月精明。星辰不 失其行, 蓂荚屈轶,紫房颉茎,史不废书,海不扬波, 山不爱宝。翠黄伏樎,兹白恋皂,焦明欢阿,而龙麟扰 于阶除。日蟹虹螾,禺蛄牛蚁,黄神黄爵,白泽解荐, 府亡虚日。是以九瀛仰化,诸北贡职,杨裘柜鬯,贯匈 长股,莫不来庭而依朔。"

《拾遗记》: "置四史以主图籍,使九行之士以统万国。九行者,孝、慈、文、信、言、忠、恭、勇、义,以观天地,以祠万灵,亦为九德之臣。韶令百辟,群臣爱德教者,先列珪玉于兰蒲席上,然沈榆之香,春杂实为宵,以沈榆之胶和之为泥以涂地,分别尊卑华戎之位也。"

# 三、祥 瑞

《淮南子》: "黄帝治天下……日月精明,星晨不失其行,风雨时节,五谷登熟,虎狼不妄噬,鸷鸟不妄搏:凤凰翔于庭,麒麟游于郊,青龙进驾,飞黄伏旱,诸北、儋耳之国,莫不献其贡职。"

《尸子》: "四夷之民,有贯胸者,有深目者,有

长肱者, 黄帝之德尝致之。"

《宋符瑞志》: "黄帝时,南夷乘白鹿来献鬯。"

《宋符瑞志》: "圣德光被,群瑞毕臻,有屈轶之草生于庭,佞人入朝,则草指之,是以佞人不敢进。有景云之瑞,有赤方气与青方气相连。赤方中有两星,青方中有一星,凡三星皆黄也。以天下清明时见于摄提,名曰景星。"

《帝王世纪》: "黄帝斋于中宫,有大鸟,鸡头、燕啄、龙形、龟颈、麟翼、鱼尾,状如鹤体,备五色,三文成字: 首文曰顺德,背文曰信义,膺文曰仁智。不啄生虫,不履生草。或止帝之东园,或巢阿阁,或鸣于庭。其饮食也,其雄自歌,其雌自舞,音如箫笙。"

《尚书中候》: "帝轩提象,配永修机。麒麟在囿,鸾凤来仪。"

《河图挺辅佐》: "黄帝修德立义,天下乃治。乃 召天老而问焉:'余梦见两龙挺白图,以授余河之都。' 天老曰:'河出龙图,洛出龟书,黄帝录列圣人之姓号、 典谋,治太平,然后凤凰处之。今凤凰已下三百六十日 矣,天其授帝图乎?'黄帝乃祓斋七日,至于翠妫州,大 鲈鱼折溜而至,乃与天老迎之,五色毕具。鱼汛白图兰 叶朱文以授黄帝,名曰录图。"

# 黄帝之仙化与陵墓

# 一、修仙

《庄子》:"黄帝立为天子十九年,令行天下,闻广成子在于空同之上,故往见之曰:'我闻吾子达于至道,敢问至道之精。吾欲取天地之精,以佐五谷,以养民人。吾又欲官阴阳以遂群生,为之奈何?'广成子曰:'而所欲问者,物之质也;而所欲官者,物之残也。自而治天下,云气不待族而雨,草木不待黄而落,日月之光益以荒矣。而佞人之心翦翦者,又奚足以语至道!"黄帝退,捐天下,筑特室,席白茅,闲居三月,复往邀之。广成子南首而卧,黄帝顺下风膝行而进,再拜稽首而问曰:'闻吾子达于至道,敢问治身,奈何可以长久?'广成子蹶然而起曰:'善哉问乎。来!吾语汝至道。至道之精,窈窈冥冥;至道之极,昏昏默默;无视无听,抱神以静,形将自正,必静必清。无劳汝形,无摇汝精,乃可以长生。目无所见,耳无所闻,心无所

知,汝神将守形,形乃长生。慎汝内,闭汝外,多知为 败我。为汝遂于大明之上矣,至彼至阳之原也,为汝入 于窈冥之门矣, 至彼至阴之原也。天 地 有 官, 阴 阳有 藏, 慎守汝身, 物将自壮,我守其一,以处其和。故我修 身千二百岁矣,吾形未尝衰。'黄帝再拜稽 首 曰:'广 成子之谓天矣。'广成子曰: '来!吾语汝。彼其物无 穷,而人皆以为终;彼其物无测,而人皆以为极。得吾 道者,上为皇,而下为王;失吾道者,上见光,而下 为土。今夫百昌皆生于土,而反于土。故余将去汝,入 无穷之门, 以游无极之野, 吾与日月参光, 吾与天地为 常。当我缗乎?远我昏乎?人其尽死,而我独存乎?' 黄帝将见大隗乎具茨之山,方明为御,昌寓骖乘,张若、谮 朋前马, 昆阍、滑稽后车,至于襄城之野, 七圣皆迷, 无 所问途,适遇牧马童子问途焉。曰: '若知具茨之山 乎?'曰:'然。''若知大隗之所存乎?'曰:'然。' 黄帝曰: '异哉小童! 非徒知具茨之山, 又知大隗之所 存。请问为天下!'小童曰:'夫为天下者,亦若此而 已矣! 又奚事焉。余少而自游于六合之内, 余适有瞀 病,有长者教予曰,'若乘日之车,而游于襄城之野。'今 余病少痊,予又且复游于六合之外。夫为天下,亦若此而 已,予又奚事焉!'黄帝曰:'夫为天下事,则诚非吾子 之事。虽然,请问为天下!'小童辞,黄帝又问。小童 曰: '夫为天下者, 亦奚以异乎牧马者哉? 亦去其害马 者而已矣。'黄帝再拜稽首,称天师而退。""知北游于玄水

之上, 登隐弅之丘, 而适遭无为谓焉。知谓无为谓曰. '予欲有问乎」若何思何虑则知道?何处何服则安道? 何从何道则得道?'三问而无为谓不答也。非不答,不知 答也。知不得问, 反于白水之南, 登狐阕之上, 而睹狂 屈焉。知以之言也问乎狂屈。狂屈曰: '唉!予知之, 将语若中欲言, 而忘其所欲言。'知不得问, 反于帝宫, 见黄帝而问焉。黄帝曰: '无思无虑,始知道; 无处无 服,始安道:无从无道,始得道。'知问黄帝曰:'我与 若知之,彼与彼不知也,其孰是邪?'黄帝曰:'彼无 为谓真是也, 狂屈似之, 我与汝 终不 近 也。 夫知 者不 言, 言者不知。故圣人行不言之教。道不可致, 德 不 可 至,仁可为也,义可亏也,礼相伪也。故曰失道而后德, 失德而后仁, 失仁而后义, 失义而后礼。礼者道之华, 而乱之首也。故曰为道者日损, 损之又损之, 以至于无 为。无为而无不为也。今已为物也,欲复归根,不亦难 乎? 其易也, 其惟大人乎? 生也死之徒, 死也生之始, 孰知其纪?人之生,气之聚也,聚则为生,散则为死, 若死生为徒,吾又何患? 故万物一也。是其所美者为神 奇, 其所恶者为臭腐; 臭腐复化为神奇, 神奇复化为臭 腐。故曰通天下一气耳,圣人故贵一。'知谓黄帝曰: '吾问无为谓,无为谓不应我。非不 我 应,不知 应 我 也。吾问狂屈,狂屈中欲告我,而不我告。非不我告, 中欲告而忘之也。今予问乎若, 若知之奚故 不 近?'黄 帝曰: '彼其真是也,以其不知也。此其似之也,以其忘

之也。予与若终不近也,以其知之也。'狂屈闻之,以黄帝为知言。"

《春秋合诚图》: "黄帝请问太一长生之道。太一曰: '斋戒五丁, 道乃可成。'"

《符子》: "黄帝将适昆虞之丘,中路逢容成子乘翠华之盖,建日月之旗,骖紫虬,御双鸟。黄帝方明游路,谓容成子曰: '吾将钓于一壑,栖于一丘。'"

《泰壹杂子》,"黄帝谒峨嵋见天真皇人,拜之玉 堂,曰:'敢问何为三一之道?'皇人曰:'既已君统 矣,又咨三一,无乃郎抗乎? 古之圣人, 盍三辰, 立晷 景, 封域以判邦, 山川以分阴阳, 寒暑以守岁, 道执以 卫众, 交质以聚民, 借械以防奸, 军服以章等, 皆法乎 天, 而鞠乎有形者也。天地有启闭, 日星有薄失, 治乱 有运会, 阴阳有期数, 贤愚之蔽, 寿 夭 之 质, 贵 贱之 事, 吉凶之故, 一成而不变, 类气浮于上, 而精气萃于 下,性发乎天命,成于人,使圣人以为之纪。是以圣人 欲治天下,必先身之,立权以聚财,葵财以施智,因智 以制义, 由义以出信, 仗信以著众, 用众以行仁, 安仁 以辅道, 迪道以保教, 善教以政俗, 从俗以毓质, 崇质 以恢仁: 勤行以典礼, 制礼以定情, 原情以道性, 复性 以一德, 成德以叙命, 和命以安生。而天下自尔治, 万 物自尔得, 神志不劳而真一定矣。子以蕞尔之身, 而百 夫之所为备,故天和莫至,悔吝屡 庚生 杀。失寒 暑之 官,动静戾刚柔之节,而贪欺终无所用,无乃已浮乎?'

黄帝乃终身弗违,而天下治。"

《拾遗记》: "帝使风后负书,常伯荷剀,旦游洹流,夕归阴浦,行万里而一息,洹流如沙尘,是践则陷,其深难测,大风吹沙如雾,中多神龙鱼鳖,皆能飞翔。有石蕖青色,坚而甚轻,从风靡覆其波上,一茎有叶,千年一花。其地一名沙澜,言沙踊起而成波澜也。"

《列仙传》: "宁封子, 黄帝时人 也, 为 黄帝陶正。有异人通之,为其掌火,能出五色烟。久则以教封子,封子积火自烧,而随烟气上下,视其灰烬犹有骨。时人共葬于宁北山,故谓之曰宁封子焉。"

《遁甲开山图》: "绛北有阳石山,有神龙池,黄帝 遗云阳先生养龙于此。帝王历代养龙之处,因有水旱, 不时祀池请雨。"

《论衡》: "沧海之中有度朔之山,上有大桃木, 其屈蟠三千里,其枝间东北曰鬼门,万鬼所出入也。上 有二神人,一曰神荼,二曰郁垒,主阅领万鬼。恶害之 鬼,执以苇索,而以食虎。于是黄帝乃作礼以时驱之, 立大桃人,门户画神荼、郁垒与虎,悬苇以御凶魅,有 形故以食虎。"

《史记·封禅书》: "黄帝时万诸侯,而神灵之封居七千。天下名山八,而三在蛮夷,五在中国。中国华山、首山、太室、泰山、东莱,此五山黄帝之所常游,与神会。黄帝且战且学仙。"

《易林》: "黄帝出游, 驾龙乘凤,东上太山,南游

# 二、铸鼎与化升

《史记·封禅书》:"黄帝作宝鼎三,象天、地、人。"

《鼎录》: "金华山黄帝作一鼎,高一丈三尺,中 如十石甕,象龙腾云,百神兽满其中。"

《一统志》: "河南阌乡县南二十五里有铸鼎原。"

《古今注》:"世称黄帝炼丹于凿砚山乃得仙,乘 龙上天,群臣悉持龙须,龙须坠而生草曰龙须。"

《史记·封禅书》: "公孙卿曰: '……黄帝采首山铜铸于荆山下。鼎既成,有龙垂胡髯,下迎黄帝。黄帝上骑,群臣后宫从上者七十余人。龙乃上去。余小臣不得上,乃悉持龙髯,龙髯拔堕,堕黄帝之弓。百姓仰望黄帝既上天,乃抱其弓与胡髯号,故后世因名其处曰鼎湖,其弓曰乌号。'于是天子(汉武帝)曰: '嗟乎!吾城得如黄帝,吾视去妻子如脱躧耳。'……其来年冬……遂北巡朔方,勒兵十余万,还,祭黄帝冢桥山,释兵须如。上曰: '吾闻黄帝不死,今有冢何也?'或对曰:'黄帝已仙上天,群臣葬其衣冠。'"

《皇览》: "好道者言黄帝乘龙升云登朝霞,上至列阁倒影,经过天官。"

《通鉴外纪》: "帝采首 山之 铜, 铸 鼎于 荆山之

隅, 鼎成崩焉。其臣左彻取衣冠几杖而庙祀之。"

《博物志》: "黄帝登仙,其臣左彻者,削木象黄帝,率诸侯以朝之。"

《路史·疏仡纪·黄帝》 "采首山之铜,铸三鼎于 荆山之阳,以象泰乙,能轻能重,能读能行,存亡是谂, 吉凶可知。武豹百物为之眠火参炉。八月既望,鼎成死 焉,葬上郡阳周之桥山。其臣左彻感思,取衣冠几杖而 庙像之,率诸侯而朝焉。"

《纪年》: "帝以土德王,应地裂而沛葬,群臣有 左彻者,感思帝德,取衣冠几杖而庙飨之,诸侯大夫岁 时朝焉。"

《剑经》: "黄帝铸鼎以疾崩,葬桥山。后五百年山崩,空室无尸,惟存宝剑赤舄。"

《列仙传》: "黄帝自择亡日,至七十日亡。七十日还葬于桥山。"

《帝王世纪》:"或传以为仙,或言寿三百岁。"

《图书集成》五四六, "中部县黄帝庙,在城东三里。旧在桥山之西,宋开宝中移建于此。元至正中,平章王九皋重修。明三岁,遣官大祭,役一州三县之人,以时修葺。"

《史记·封禅书》: "高祖……入关,问故秦时上帝祠何帝也?对曰: '四帝,有白、青、黄、赤帝之祠。'高祖曰: '吾闻天有五帝,而有四,何也?'莫知其说。于是高祖曰: '吾知之矣。乃待我而具五也。'

乃立黑帝祠。"

《汉武故事》: "元封元年,帝北巡还,祭黄帝冢桥山。"

《史记·封禅书》:上(汉武帝) "北巡朔方,勒 兵十余万,还祭黄帝冢桥山,释兵须如。"

### 三、陵 墓

## 甲、言在陕西者

《史记·五帝本纪》: "黄帝崩,葬桥山。"

《尔雅》:"山锐而高曰桥。"

《史记·集解》: "《皇览》曰:'黄帝冢在上郡桥山。'"

《史记·索隐》;"地理志云:上郡阳周县桥山南 有黄帝冢。"

《史记·正义》: "《括地志》云: 黄帝陵在宁州 罗川县东八十里子午山。"

《风土记》: "阳州所有黄帝陵,在子午山上。"

《路史·疏仡纪·黄帝》:"葬上郡阳周之桥山。"

《图书集成》五四八: "中部县有轩辕柏,在轩辕庙。考之杂记,乃黄帝手植物,围二丈四尺,高可凌霄。"

《图书集成》五四八: "中部县有挂甲柏,在轩辕庙。黄帝既灭蚩尤,归而挂甲其上,至今树皮每尺许有

排痕密布,彷佛钻甲状。柏液中出,似有断钉在内。老 干细枝,痕迹皆一,为古今奇景。"

《图书集成》五四九: "中部县上古桥陵在城北山上。世传轩辕黄帝铸鼎成,乘龙升天,其臣取衣冠葬于此。"

《图书集成》五四二: "中部县龙首山,在城东十五里,即黄帝龙驭之首山。"

《图书集成》五四二:"中部县凤岭,在城西郭外,世传轩辕戳檞谷竹成律吕,凤鸣于此。"

《陕西通志·陵墓》二: "桥山在中部县东北二里。其山形如桥,沮水环之,即黄帝葬衣冠之所。"

《陕西新省志》云: "桥陵在城北二里桥山上。山形如桥,故名桥山。陵曰桥陵,沮水环之,黄帝葬衣冠之所。详前通志。"原案云:浙江程寿筠筱亭,前知中部县,以桥陵为圣迹,恐渐倾没,将桥陵八景一一摄影,装潢成册。

- (一) 古碑,中书"桥山龙驭"四大字,旁题"大明嘉靖丙申十月九日滇南唐某书",八景之一。大殿左角圯,殿门额题"德隆邃古"四字。柏柯横斜殿瓦上,如鸾翥,如凤翔,如神虬,自天飞下,而藏其尾。
- (二) 大神龛, 黄帝冕旒中坐, 二 侍 者 分 立龛 内。龛外四宰臣执笏立, 二老二少。
- (三) 一碑露立群柏中, 隶书"汉武仙室"四字。

- (四) 柏侧一亭中竖大石碑,隶书"古轩辕 黄帝 桥陵"七字,题陕西巡抚毕沅 谨 书二十余 字,左题"大清乾隆岁次丙申知中部县事董 廷楷立石"十八字。碑左一小碑,亦书"桥 山龙驭"四字。
- (五) 两柏间一庑,中列碑无数,殆历代褒崇祭 享时所立者。
  - (六) 居前一碑,背负巨石,石旁大柏一,碑题 "轩辕庙四千年古柏"八字,旁题程君名 衔。
  - (七) 群小柏中一巨柏, 较前柏微小, 题字同。
- (八) 庑侧一巨柏,不甚高而浓阴郁郁,其上书 "汉武帝征朔方还挂甲于此树"。隶书末 题曰: "桥陵八景,载在志乘,恐日就湮 没,爰逐景撮影,隶书刊石,以资保存。" 此三十一字,盖程君所书也。

#### 乙、盲在河北者

《魏书·太宗纪》:神瑞二年六月"壬申,幸涿鹿登桥上,观温泉,使使者以太牢祠皇帝庙"。泰常七年九月"辛酉,幸桥山,遣使者祠黄帝"。

《魏书·世祖纪》: 神廳元年"八月,东幸广宁, 临观温泉,以太牢祭黄帝。"

《畿辅志》: "轩辕陵在平谷县东北十五里渔子山下。"

## 丙、言在山东者

《一统志》: "轩辕寿陵在曲阜县东北二里。" 《广舆记》: "轩辕寿陵在山东兖州府曲阜县。"

#### 丁、言在河南者

《历代陵寝备考》: "《外纪》: '帝采首山之铜,铸三鼎于荆山之阳,鼎成崩焉。其臣左彻取衣冠几杖而庙祀之。'《一统志》:'河南阌乡县南二十五里有铸鼎原。'按首山在今河南许州襄城县西五里。《史记》曰:'天下名山有八,而三在夷狄, 五在中国,皆黄帝尝游,首山其一焉。'"

《阌乡志》: "轩辕陵在县南十五里。"

《日下旧闻补遗》: "轩辕陵在桥山,载记所同。 然桥山非一,上郡妫州皆 有之……郭 景纯注《山 经》 云: '帝王冢墓,皆有定处,而《山经》往往复见,盖圣 人久于其位,仁化广及,至于殂亡,四海无思不哀,故 绝域殊俗之人,闻天子崩,各自立位而祭,起土为冢, 是以所在有焉。'景纯之论,可谓善言古者矣。"

# 四、后人赞颂

黄帝赞 曹 植 少典之子,神明圣咨。 土德承火,赤帝是灭。 服牛乘马,衣裳是制。 氏云名官, 功冠五列。

黄帝赞 曹 毗轩辕应元期,功能总百神。 体炼百灵妙,气含云露津。 掺石曾城岫,铸鼎荆山滨。 豁焉天扉辟,飘然跨腾鳞。 仪辔洒长风,褰裳蹑紫宸。

黄帝赞 挚 虞 黄帝在位,实号轩辕。 车以行陆,舟以济川。 弧矢之利,弭难消患。 垂衣而治,万国乂安。

——上见《历代陵寝备考》

子 午 岭 刘 倬 南北亘长岭,纵横列万山。

桥陵今古在, 驰道有无间。 地拆庆延迥, 源分漆沮潺。 秦皇开凿后, 塞上几人还。

——上见《陕西通志·艺文》》十二

## 桥山陵古柏赋 刘尔怿

维上郡之列域兮,山岗 以多奇。耸子 午以 衍 灵兮, 历双钟而分支。合三川以右潆兮, 凤凰 高 峙 于 西 陂。揖衙岭而忽止兮,诸峰环卫而共之。王气郁郁万年兮,相传轩帝衣冠藏于斯。周穆驭八骏登太行兮,越汉武祈仙而立祠。

乃筑台榭,爰作宫宅。周亿丈之城,植千种之柏,山丰土厚,祥萃地脉。时有云气以布濩,挹朔风而沾雨露之泽。闰魏晋与五代,奄唐宋以为晨夕。经岁历祀,瑞霭氤氲。高者参天,低亦拂云。干亭亭以直上,枝丝丝而旋纹。叶丛蔚而攒秀,气苾苾兮吐芬。

非烟非雾,亦青亦苍。黛横半岭,绿堆高岗。崔苇 疑凝素于千顷,藻듏似涵碧于汪洋。经回风而翻黯,色 屡变而复黄。俯圣人之幽宫,翳森排于鼎湖之旁。傲四 时而常贞,曾不畏雪霰与冰霜。

当夫青阳布令,勾芒鞭春。木欣欣以就荣,草芊芊 兮向新。旭日始旦,士女缤纷。骚人墨客,公子王孙。 携酒榼以登高,或藉草以作茵。踏树影之参差,灼百寻 之龙鳞。醉飘飘而若仙,拾翠色以修真。 既而溽暑炎蒸,火云四吐,山川焞焞,热欲焦土。 厚阴叠覆,如坐广宇。凉飔生寒,恍闻风雨。夜既沉而 淹留,划长啸而起舞。

若夫梧桐惊落于一叶,霜林点缀夫 秋 容。桂 影 婆 娑,皓魄当空。周匝密布,四望皆同。山高月小,滚滚 水中。练曳龙首之口,珠耀水晶之宫。问天柱之远近,信广寒之可通。

至若北风觱发,彤云欲雪,天地一抹,人迹断绝。 枯枝秃干,六花凝结。如虎豹蹲,如冰柱折。尔乃扫雪 石,和玉屑,流脂可煮,爽气堪挈。俨问道于崆峒,叩 广成以秘诀。

乱日昆仑, 西来奠桥陵兮; 二流环合, 漆沮澄兮轩皇之藏风气凝兮。龙髯莫攀, 邈独留此佳城兮; 翠柏烟含, 时有仙人飞腾兮。青青者叶, 应圣人生兮; 天开有道, 翊我皇清兮。和气嘉祥, 色葱葱其滋荣兮; 万国享王, 销戈兵兮。卜年卜世, 如松柏之茂, 无不尔或承兮。

桥 山 李梦阳 黄帝骑龙事杳茫,桥山未必葬冠裳。 内经泄秘无天地,律吕通神有凤凰。 创见文明归制度,要知垂拱变洪荒。 汉皇巡视西游日,万有八千空路长。 桥 山 杨 兆 桥山之上有轩辕,寂寞松楸剑履存。 高冢旧余天子气,诸峰还让丈人尊。 青山雉尾当时事,白月龙髯何处屯。 犹似垂裳望仙侣,千官扈从隔昆仑。

桥 山 王 丘 轩辕何事厌尘寰,自昔乘龙去未还。 万国有臣空恋慕,九重无路许追攀。 争知仙驾游何处,犹说衣冠葬此山。 终古风云劳拥护,神光尝射斗牛间。

桥山祈仙台 张三丰 披云履水谒桥陵,翠桕烟含玉露轻。 裒冕霞飞天地老,文章星焕海山青。 巍巍凤阙迎仙岛,渺渺龙车驻帝城。 寂寞琼台遗汉武,一轮皓月古今明。

次三丰韵 胡 淡尚书 览景来登轩帝陵,羽衣风驾骨毛轻。 桥山彻顶高耸翠,沮水缠腰中部青。 万壑烟云笼玉冢,九天秋色映龙城。 道人看罢三丰句,醉里挥毫壁上明。

大荒浮黄云, 众山失故黛。 划然川原开, 苍翠杂烟霭。 居人为予言, 桥陵在其内。 下车拂征尘, 屏息虔再拜。 古柏参青霄, 树叶如偃盖。 黄帝未仙时,此树乃先在。 其余二千株,环陵而向背。 陵庙与树连,云气时叆叆。 泪水流其中, 触石发清籁。 怀古有余情, 瞻眺得大概。 当年神圣兴,制作史具载。 采铜首山巅, 铸鼎荆山界。 鼎成龙下迎, 其说近迂怪。 左彻不及从,抱弓致忠爱。 凿山葬衣冠, 庙祀崇百代。 且战且学仙, 汉武发深慨。 至今祈仙台, 芳草尚晻蔼。 候神幸纵山, 采药遍海外。 封禅何纷纷, 徒为公孙卖。 予意帝至尊, 不幸亦何害。 缅彼垂裳年, 古今共嘉赖。 不死今有冢, 此言良大快。 惟有柏长生,风雨勿能坏。

## 轩 辕 柏

刘尔怡

辕轩庙前挂甲柏,霜根铁节坚如石。 老干挺直五十围,枝叶密排三千尺。 功开浑沌先天地,造物合当存爱惜。 南接华岳通云气,风来呼吸连太白。 (太白,山名) 飘渺三丰竟若何,此树到今尚矍铄。 (三丰题诗壁上) 传记莫考栽植年,鸟飞兔走青漠漠。 孤高自是神工力,盘踞似得巨虚托。 我今再拜揖仙翁,茹叶掇英可飞空。 九天若见骑龙人,道我还丹更御风。

和张三丰 薛柱斗 衣冠葬处号桥陵, 九转丹成四海轻。 古柏森森金杖合, 林风飒飒玉璈清。 由来帝道通仙道, 果是佳城即化城。 何日归田容一遇, 执经桥畔向真明。

> 皇陵古柏 牛光斗 轩帝登天去,陵高耸柏林。 风声同鹤唳,日影带虚阴。 叶拂晴宵翠,根盘石窦深。 仙踪应在此,踏葛一相寻。

# 桥陵怀古 蓝 熏

新远结绳治,肇开制作源。 经纶垂百代,皇古尊轩辕。 轩辕伟烈保安留,涿鹿山前破蚩尤。 武功一耀干戈戢,文教覃敷海宇柔。 銮與西狩御西土,宫阙巍巍崇九五。 一自龙驭远归天,桥陵玉冢至今传。 望望桥陵今古在,为说乘龙近迂怪。 还将乌号托遗弓,何事汉人乃附会。

和张三丰 张凤聰 高顶巍然黄帝陵,衣冠寂寞墓烟轻。 桥山耸峻千年峙,沮水潆洄万载清。 乌号当时传盛事,龙髯此日见佳城。 祈仙台畔留仙句,今古惟余夜月明。

九日同杨退庵中丞公、张子吉孝廉、赵秋水、 刘敬公文学登晋废藩台阁有怀桥山沮水

荒郊秋色草萧萧,此日乡心倍寂寥。 落帽正愁华发短,登高且喜故人招。 晋王宫阙寒烟迴,秦国关河客路遥。 极目桥山沮水畔,好将归去伴渔樵。 和张三丰 张凤翀 古柏参天黄帝陵,苍烟缭绕晓风轻。 龙盘万代开王会,凤历千秋肇大清。 地葬衣冠留胜迹,天生山水卫佳城。 祈仙汉武今何在? 炳炳日星昼夜明。

> 登 桥 山 高陟桥山上,关河万里长。 沮流声浩浩,相干色苍苍。 红日竿头进,青虚足下藏。 轩辕龙驭古,百代景冠裳。

谒轩辕庙 李 暄 區侯 万里涉江汉,分符入河而。 黄帝衣冠地,其说至今迷。 有无神仙侣,层台自虚齐。 制作开万古,洪荒事有稽。 唐虞与三代,先天奠蒸黎。 六相佐鸿烈,礼乐赞百揆。 鼎成龙垂髯,荒忽不必泥。 圣人自穆穆,何劳青云梯。 闷宫肃万象,柏林郁惨凄。 一时君臣际,巍焕高难跻。

## 禹功后世赖, 空尔告元圭。

## 和张三丰谒桥陵韵

城北山头黄帝陵,万峰环抱晚烟轻。 鼎湖不断乌号泪,龙髯空余古柏青。 绮殿依然留诗句,琼台何处觅霞城。 道人曾说亲相向,羽化云腾未易明。

(老君庵道人为三丰买瓜亲见题诗笔上)

## 登 桥 山

行随竹马入秦关, 东望桥山霄汉间。 龙去九天扶日月, 龙归玉冢覆河山。 仙台百尺堪登眺, 古柏千寻足解颜。 我欲乘风凌帝阙, 访寻仙侣不知还。

**谒桥山黄帝庙** 艾若兰 轩辕飞升不计年,桥山明月夜空悬。 瑶台寂寞生春草,玉冢荒凉笼暮烟。 人文代换江河逝,庙貌更新俎豆鲜。 述却衣冠无觅处,千秋得拜衮衣前。

桥 山 李 暄 人在先天混沌初,从中一辟道无余。 似闻风雨龙当下,想见洪濛气可嘘。 挂甲去来酣涿鹿,迎仙曾否幻蘧庐。 多年留得山头树,冉冉乘言气可徂。 又

乘龙天上事多奇, 荒史由来未可訾。 黯淡千年松柏在, 森阴一道鬼神为。 莫言铸鼎公孙幻, 尚击迎仙脱屣思。 不是郊雍能见帝, 于今安得奉明词。

又

虬柏青铜姿,风敲四时响。 肃然恭敬生,首出群生上。 山以古则灵,道由天不往。 迎仙谁有台,云何失意想。 蚩尤闻有星,云何照苍莽。 挂甲树成翁,长揖呼老丈。

**谒陵偶成** 李如玉 奕奕桥山接太空,重重松柏起秋风。 不因神圣开天统,尧舜何由允执中。

谒轩辕帝陵 上党李维藩 桥山南下沮河过,古柏苍苍枕碧波。 华胥梦还冠服盛,赤龙飞去鼎炉多。 九天仙侣朝金阙,万代子孙响玉珂。 帝德不同天地老,佇看山海变桑禾。

## 次三丰元韵

秦川北斗有桥陵, 沮水星环剑气轻。 日月光同文物盛, 乾坤氛逐武戈清。 龙飞玉露寒苍柏, 鼎铸金波满赤城。 可惜汉家雄略主, 不将帝德望昆明。 **谒轩辕陵庙** 吴琳芳 弹拂衣冠谒帝茔,环山松柏尚青青。 德参上下无多剩,气奠关河万载宁。 残碣积苔词韵古,华廊挂甲木痕腥。 仰瞻汉武祈仙处,落日迢迢冷露零。

前 题 范 俊 鼎湖龙去已多年,长有风云护几筵。 万古衣冠藏落照,四山松柏绕苍烟。 功开天地鸿濛后,道在唐虞揖让前。 当日攀髯臣子泪,惟余寒涧响流泉。

祀轩辕陵恭纪 钟 衡 乌号弓堕旧山川,盛代明禋肃豆笾。 何处衣冠留上古,此时垂拱想当年。 龙车渺渺迎仙夜,虬柏森森挂甲烟。 千载神光严对越,祥云缭绕帝宫前。

从祀和前韵 杨必名 玉殿环潆玉带川,清卿主鬯荐嘉笾。 擒蚩勋峻符今代,告庙功成似昔年。 挂甲高临仙树月,乘龙遥拂宝城烟。 喜逢祀事勤王事,对越真同黼座前。 祀桥陵恭纪三章 长白世臣 盛朝崇祀典,奉敕谒桥陵。 庙貌常巍焕,神灵自式凭。 法垂尊帝制,仙驭想龙升。 俨若冠裳在,肃雍将祗承。

峰绕桥沮山水清,帝陵巍峻柏青青。 漫言当日龙升去,犹对冠裳荐血牲。

古柏森森不记春,陵宫犹自享明禋。 轩陵制起功尚在,常使余波惠子民。


道经桥陵恭谒赋得近体二首 武之亨 學使 帝昔骑龙去九天,攀髯翘首鼎湖边。 辟开草昧人间世,惆怅云乡亿万年。 石漱沮流清夜响,月临瑶阙翠微妍。 遗弓欲觅虚无里,山水高深总漠然。

糖辕载牵马骎骎,邦手天颜异代心。象物图形如魅伏,撑风留雨听龙吟。川原未觉洪荒邈,草木凭销岁月沉。肃肃霜草经远道,云踪去住未堪寻。

桥山夜月 丁 瀚邑侯

雨洗山偏净,风吹月未阑。 光分千里碧,影落一池寒。 祇向云中觅,谁从水底看。 高崖非采石,醉后捉为难。

----上见《中部县志》



按: 邱字仙根,台湾人,为台湾独立时领袖之一。甲午后 内渡,寄居粤之镇平。其游陕谒陵,约 在 清 光 绪 年 间。前诗载邱集《岭云海日楼诗钞》。 于右任

桥陵在中部县,为黄帝衣冠塚,洛水萦回至山下,山西 峙而东向,环山小柏无数,苍翠深郁,数十里外望见之。 陵碑曰"古轩辕黄帝桥陵"。有碑亭,刻石曰"桥山 龙驭"。有庙,庙中有黄帝象。余于民国七年与王子元 谒 陵遇雨,有诗录(左);

皇祖威灵我欲攀, 西征间道礼桥山。 弥天风雨伤今日, 垂老仓皇过此间。 独创文明开草昧,高悬日月识天颜。 干霄古柏摩挲遍,挂甲何人亦等闲。

庙前有挂甲柏, 土人相传为汉武帝挂 甲 所 致, 故 当 日 此句系依为汉武帝挂甲而作。今按《图书集成》以 为 黄帝挂甲, 姑依旧作未改。 右任附记

## 祭黄帝桥陵

(明洪武四年——《陕西通志•艺文》十一)

皇帝谨遣中书管勾甘,敢昭告于黄帝轩辕氏: 朕生后世,为民于莫野之间。当有元失驭,天下纷纭,乃乘群雄大乱之秋,集众用武,荷皇天后土眷祐,遂平暴乱,以有天下,主宰庶民,今已四年矣。君生上古,继天立极,作蒸民主,神功圣德,垂法至今。朕兴百神之祀,考君陵墓于此,然相去年岁极远,观经典所载,虽切慕于心,奈禀生之愚,时有古今,民俗亦异。仰惟圣神,万世所法,将遣官奠祀修圣。圣灵不昧,其鉴纳焉。

## 祭告桥陵文

(清顺治八年四月初七日——《陕西通志·艺文》一)

自古帝王受天明命,继道统而新治统。圣贤代起, 先后一揆。功德载籍,炳若日星。明 禋 大 典,亟 宜肇 隆。敬遣专官,代将牲帛,其鉴享。

## 祭 告 文

(清康熙元年——《中部县志》)

帝王继天立极,功德并隆,治统道统,昭垂奕世。 朕受天眷命,绍缵丕基,庶政方亲,前徽是景。明禋大 典,亟宜肇修。敬遣专官,代将牲帛,爰昭启荐之忱, 聿备钦崇之礼。伏维恪歆,尚其鉴享。

## 祭告桥陵文

(清康熙二十七年十二月——《陕西通志•艺文》一)

自古帝王受天明命,御历膺图。时代虽殊,而继治 同道,先后一揆。朕承眷佑,临制万方,稽古礼文,肃 修祀事。兹以皇祖妣孝庄仁宣诚宪恭懿翊天启圣文皇后 神主升祔太庙,礼成,特遣专官,代将牲帛,虔修禋祀 之典,用抒景行之忧。仰冀明灵,兹鉴诚悃。

## 祭桥陵文

(清康熙四十二年五月——《陕西通志艺文》一)

自古帝王,继天立极,出震承乾,莫不道洽寰区, 仁周遐迩。朕钦承丕绪,抚驭兆民,思致时雍常殷,惕 励历兹,四十余载。今岁适届五旬,宵旰兢兢,无敢暇 逸。渐致民生康阜,世运升平。顷因黄淮告成,亲行巡 历,再授方略,善后是期。睹民志之欢欣,滋朕心之轸 恤,遄回銮驭,大沛恩膏,用遗专官,敬修祀典,冀默 赞郅隆之治, 益弘仁寿之休。尚鉴精忱, 俯垂昭格。

## 祭 告 文

(清雍正元年——《中部县志》)

自古帝王继天出治,建极绥猷,莫不泽被生民,仁周宇内。惟我皇考峻德鸿勋,媲美千古,显谟承烈,垂裕后昆。朕以渺躬缵膺大宝,当兹嗣位之始,宜修享祀之仪。特遣专官,虔申昭告,惟冀时和岁稔,物阜民安,淳风偏洽乎寰区,厚德常敷于率土。尚其歆格,鉴此精诚。

## 祭 告 文

(清乾隆四十五年——《中部县志》)

惟帝体元赞化,建极绥猷,泽被生民,勋垂奕世。 简编明备,累朝之治法相传;弓剑留藏,千载之英灵如 在。兹以朕七旬展庆,九有腾欢,懋举崇仪,特申昭 告,缅当日之历图受箓,每深景仰之忱,抚此时之集嘏 凝禧,弥切祇寅之念,冀佑郅隆之运,永贻仁寿之庥。 式荐精禋,惟祈鉴格。

## 祭 告 文

(清嘉庆五年——《中部县志》)

自古帝王受箓膺图,乘时御宇,罔不宪天立极,宥 密单心。故能泽洽万方,德昭百世。朕承鸿典,景仰前 徽。兹以嘉庆四年十一月二十六日恭奉高宗法天隆运、 至诚先学、体元立极、敷文奋武、孝慈神圣、纯皇帝主 配享圜邱,礼成,特遣专官虔申昭祀,惟冀孚佑皞熙之 运,益昭安阜之风。鉴此精格,尚其歆格。

# 黄帝庙碑序 李昉

(《陕西通志·艺文》九)

天下暴乱,圣人用干戈而靖之;天下宁静,圣人用 道德而化之。昔有蚩尤肆残毒, 孰能 去焉? 涿 鹿 有氛 侵,孰能平焉?黄帝所以镇神威而大定也。云官纪符 瑞,孰能享焉? 土德成运数,孰能兴焉? 黄帝所以神明 德而致太平也。披史册览五帝之旧纪, 阅经籍稽百王之 大典, 以治世之法为师范, 以严祀之礼立教化, 大宋阐 统之十有三祀,开宝纪号之五载,彝伦攸叙,万国咸 宁, 西踰邛僰之乡, 东极神枢之地, 北穷绝塞, 南极丹 崖,靡不沐皇风而被德教。万里之斥堠无虞,四方之风 雨咸若; 文武并用, 农战交修; 师旅无六月之征, 仓庾 备九年之蓄;途歌里唱,远颂近谣矣。惟我皇帝陛下, 握乾符, 受天命, 为亿兆之主, 居九重之尊; 静则端拱 凝旒,来八方之琛赆;动则灵旗萃辂,荡六合之妖孽; 圜丘展礼, 天地享其至诚; 万物效灵, 人神协其佳瑞; 所谓登三皇而迈五帝也。一日御便殿, 顾 谓 辅 臣 曰: "前代帝王有功德昭著,泽及生民者,宜加崇奉,岂可 庙貌堕而享祀寂寞乎?"当命有司遍加兴 葺。辅臣 承

命, 拜称万岁。即日颁旨, 洋洋德音, 无 翼 而 飞 域中 矣。今坊州黄帝即其一也。本郡守土臣,以厥功告毕, 列状求文,诏以掌纶之臣坊,俾文之以琬琰,用纪其修 建之迹。臣坊谨摭旧史而飏言曰: "昔者炎帝道衰,诸 侯未制,惟力是特,伊民何依。黄帝于是神聪明之德, 振威武之气。雕虎一啸, 猛暴不觉震惊; 神龙未起, 陆 梁先知悚惧。始以兵法治其乱,次以帝道柔其心,寰海 尘飞,一朝尽息,修德振旅,劝农务穑。登沅湘而逐薰 鬻,无远不验,举风后而用力牧,惟贤是试。少昊颛顼 嗣其瑞云之德而宇宙清, 唐虞尧舜法其垂衣 之 道 而 域 中化。天生斯民,树之司牧。为司牧者,能以皇帝修身 理国之道,以御今之世,而生灵不登仁寿之域者,未之 有也。天有历数, 锺我皇朝; 考求参订, 徵 祀 事于前 文: 芷藻蘋蘩, 荐时羞于广殿。羽卫似巡于东海, 神兵 如战于阪泉。尚凭德于威灵, 永垂休于黎献。虔遵睿 旨, 谨序。

## 重修轩辕黄帝庙募缘序 刘尔榉

万物果无始乎?天生人何为也!万物能忘其始乎?人 祀圣人何为也! 圣人群祀于人乎? 首出御世皆圣人也! 惟创始者尊于世,三皇以及羲轩皆有功于天地之始也。 唯定制度者切于民, 予于是知黄帝之功在万世, 为凡有 血气者之永思不忘也。昔者穴居野处,帝始作宫室。昔者 污樽杯饮, 帝始制器用。昔者结绳而治, 帝始有书契文

字。而且命大挠作甲子, 伶伦造律吕。兴衣裳之制, 习 干戈之用, 利赖至今者, 固其功也。 夫功者 切 乎 民 者 也。民享其功,思其所从来,而庙者兴矣。中部有黄帝 庙,盖黄帝葬桥山,因其地而祠之,礼也。创于汉,至 宋而益饬, 历元明迄今, 岁春秋有司黝垩严祀事。三岁 则天子命官匦帛载御祝持节来,太守先期役一州三邑之 人, 撤朽剜蚀, 植欹筑颓。工告成功, 然后太守率鄜刺 史及洛中宜三令,届时而斋宿焉。而天子践位初,则又 特遣大臣祭以告始,以故庙制视古来帝王庙独宏敞,且实 枚焉。顺治辛卯,先帝亲政, 宗伯王公觉斯以帝命肇祀于 庙,今十有七年矣。岁久祀缺,庙遂颓败。迩抚都御史 贾公恻然弗自宁也,以檄河西副宪,副宪鲍公亲诣庙谒 览焉。而叹曰: "事孰有急于此者乎? 乃 兹 颓 焉 弗修 也!"于是下令庀材程工。太守王公则曰:"是不可重劳 民。"乃捐俸资之。而司李刘公谓予曰:"事集于人, 功成于众,子何言之?"予曰:"功 崇 者 世,泽 永者 思。今孰不居尔宫室, 利尔器用, 习尔文书, 而律历而 衣裳,此世者之道。而思之永者也,则谁不思饬厥祠!" 矧是役也, 宪司身其事, 太守与公尝董率之。 夫上所令 下奉唯谨也,上所为下弗力恤也。彼文武将吏,有事于延 之封域者,原集其资以襄厥事,亦义所不得辞也。诗曰, "敬恭明神。"按祀典废厥祠祝不举者不敬,不敬者削以 地。《礼》:诸侯祀封内山川,及古帝王。陕以西,岳 曰华,镇曰吴,古帝王自周文武以下,祀各以其地。黄

帝之祀,惟上郡封内,则属兹庶执事,可不敬成事欤? 且人未有不念其所自始者。考氏族谱 世 系,多 出 自黄帝。肃尔宫庙,又人本乎祖之义也。倘人不力爱、众弗赀、吝群相与以有成,则不惟有以仰副诸公敬共明神之意,而他日者,天子修废典,举三岁大祭秩宗来,将禋事仰瞻 阙洫,不且大有光于朝廷哉!惟庶执事勉之!"

# 黄帝本纪

### ——自《史记·五帝本纪》中录出

黄帝者,少典之子,姓公孙,名曰轩辕。生而神灵,弱而 能言,幼而徇齐,长而敦敏,成而聪明。

轩辕之时,神农氏世衰。诸侯相侵伐,暴虐百姓,而神农 氏弗能征。于是轩辕乃习用干戈,以征不享,诸侯咸来 宾从。 而蚩尤最为暴,莫能伐。炎帝欲侵陵诸侯,诸侯咸归 轩辕。轩 辕乃修德振兵,治五气,艺五种,抚万民,度四方,教 熊罴貔 貅䝙虎,以与炎帝战于阪泉之野。三战然后得其 志。 蚩尤作乱, 不用帝命,于是黄帝乃征师诸侯,与蚩 尤战于涿鹿之野,遂擒 杀蚩尤。而诸侯咸尊轩辕为天子,代神农 氏,是为黄帝。

天下有不顺者, 黄帝从而征之, 平者去之。披山通 道, 未尝宁居。东至于海,登丸山, 西至于空桐,登鸡头, 南至 于江,登熊湘, 北逐荤粥, 合符釜山, 而邑于涿鹿之阿。迁徙往 来无常处, 以师兵为营卫。

官名皆以云命,为云师。置左右大监,监于万国。万国和,而鬼神山川封禅与为多焉。获宝鼎,迎日推策。举风后、力牧、常先、大鸿以治民。顺天地之纪,幽明之占,死生之说,存亡之难。时播百谷草木,淳化鸟兽虫 蛾,旁罗日月星辰,水波土石金玉,劳勤心力耳目,节用水火材物。有土德之瑞,故号黄帝。

黄帝二十五子,其得姓者十四人。黄帝居轩辕之 丘,而娶于西陵之女,是为嫘祖。嫘祖为黄帝正妃,生二子,其后皆有天下。其一曰玄嚣,是为青阳,青阳降居江水,其二曰昌意,降居若水。昌意娶蜀山氏女,曰昌仆,生高阳,高阳有圣德焉。黄帝崩,葬桥山。其孙昌意之子高阳立,是为帝颛顼也。

# 中部县八景

#### ---录自(图书集成》五四二

### 桥山夜月

桥山高耸, 古柏密布。山藤夜月, 映之如荇。藻涵水 中, 幽景奇绝。

#### 沮水秋风

沮水多佳木, 秋风至, 红叶刀刀, 下浮水面。念 伊人者, 有在水一方之思。

### 龙湾晓雾

龙首传为轩辕龙驭之首山, 晨必吐雾, 瑞色射人目。

#### 凤岭春烟

凤凰山逼邑城,烟浮其上,霭霭缭绕,久而不散。

### 南峪黄花

黄花峪, 有滴珠泉, 水滴下皆如花。

### 北桥净雪

北桥有石,大雪霏霏,石上如帚扫弗凝。

### 汉武仙台

析仙台,汉武所筑。登其上,诸山咸拱, 秃柏 环立,凛凛 不可久留。

### 桥陵古柏

柏多轩辕手植,老干凌霄,似虬龙盘空中,鳞甲 走动,风雨更奇。

# 说 明

我们繁荣昌盛的伟大祖国,现已雄立于世界之林。 千万爱国仁人志士、海内外同胞,来拜谒黄陵和观光者络绎不绝,都以自己是黄帝子孙而感到无尚光荣,都希望得到有关黄帝的史料,对先祖有一个较全面的了解。适有于右任先生的《黄帝功德纪》一书,将史籍及传说中有关资料采撷整理,列为黄帝之家世、黄帝与中华民族、黄帝与中国文化、黄帝之政绩、黄帝仙化与陵墓,以及黄帝本纪等专题,可供读者参考。其中一些内容不尽确切,需要加以分析,如黄帝仙化等神话传说,请读者注意。

本书编写于解放以前,错误较多。这次排印,仅据 中国古印书局本与监察院排印本互校,择善而从。由于时 间伧促,错漏未能详细改正,恳乞读者原谅,并望读者 引用时核对原著。

> 黄陵县政协 宋兆杰 高增安 一九八六年十月

## 黄帝功德纪

于 右 任

陕西人名《《私出版发行 (西安北大街31号)

ISBN7-224-00016-7/K·4 统一书号: 11094·221 定价: 0.78元

封面设计 姚正选